

Ҳақнинг розилиги ота-она розилигида

Бозорда эдик. Сотувчиларнинг қўли-қўлига тегмайди. Шу пайт навқирон йигит кекса отасига: “Дада, имилламасдан тез-тез ўлчаб бермайсизми, одамлар кутиб қоляпти. Ортиқча юк бўлдингиз-да. Ундан кўра ўғлимни олиб келсам бўларкан”, деди. Унинг отасига қилган бу муомаласидан музлаб қолдим.

Афсус, ота-онасининг қадрига етмай, беҳурмат қиласидан бундай инсонлар ҳаётда учраб туради.

Куръони каримнинг йигирмага яқин оятида ота-онага яхшилик қилиш буюрилган. Жумладан, Исро сурасининг 23-оятида бундай дейилади: «Раббингиз Унинг Ўзигагина ибодат қилишингизни ҳамда ота-онага яхшилик қилишни амр этди. (Эй инсон!) Агар уларнинг бири ёки ҳар иккиси ҳузурингда кексалик ёшига етсалар, уларга “үфф!..” дема ва уларни жеркима! Уларга (доимо) ёқимли сўз айт!»

Пайғамбаримиз соллаллоҳу алайҳи ва саллам огоҳлантирганлар: “Аллоҳ таолонинг розилиги – ота-онанинг розилигида, Унинг ғазаби эса ота-онанинг ғазабидадир” (И мом Табароний ривояти).

Бугун орамизда ота-онасини норизо қилаётган, уларнинг ғазабига қолаётганлар оз эмас. Бундай кишиларнинг юриштуриши, ҳаётида ҳаловат йўқ. Топиш тутишида барака бўлмай, ҳаётдан нолиб ўтади. Лекин иши юришмаслигию бири икки бўлмаётгани сабабини англаб етмайди. Зоро, қачон ота-она рози, дуода бўлса, фарзанднинг бахти иқболи кулади. Уларга яхшилик қилган кишини Аллоҳ ҳам сужди ва ундан марҳаматини дариф тутмайди.

Абдуллоҳ ибн Масъуд розияллоҳу анҳудан ривоят қилинади. Мен Набий соллаллоҳу алайҳи ва салламдан:

“Ё Расулуллоҳ, қайси амал Аллоҳга энг суюмли?” деб сўрадим. У зот: “*Вақтида ўқилган намоз*”, дедилар. “Кейин қайси?” дедим. “*Ота-онага яхшилик қилиши*”, дедилар (Муттафақун алайҳ).

Расулуллоҳ соллаллоҳу алайҳи ва саллам:

– *Она-отасининг юзига марҳамат билан боқсан кишига ҳаж ва умранинг савоби ёзилади*, – дедилар.

– Кунда минг марта боқса ҳам шундайми? – деб сўрадилар.

– *Кунда юз минг марта боқса ҳам*, – дедилар (И мом Байҳақий ривояти).

Бошқа бир ҳадисда Онҳазрат:

– *Албатта, Аллоҳ таоло қарами кенг, улуғ зотдир ва ажру савобларини яхши бандаларидан дариф тутмагай*, – деб жавоб бердилар (И мом Байҳақий ривояти).

Албатта, ота-она – тенгсиз давлат. Уларнинг борлиги, дуолари ҳамда хурсандчиликлари қалбларимизга, хонадонларимизга барака, нур олиб киради. Ризоликлари эса ризқимиз бутунлиги, умримиз узунлиги ҳамда мушкулларимиз осон, ғаму ташвишлардан фориғ бўлишимизга боис бўлади. Шунинг учун ҳам фарзанд ота-онасини асраб-авайлаши, ширин сўзлар билан уларнинг кўнглини кўтариши, агар кексалик ёшига етган бўлсалар, барча инжиқликлариға чидаши керак. Ана шунда фарзанд муродига етади.

Ибн Аббос розияллоҳу анҳумодан ривоят қилинади. Расулуллоҳ соллаллоҳу алайҳи ва саллам: “*Қайси бир мусулмоннинг ота-онаси бўлса, уларга яхшилик қилиб, унинг савобини кутган ҳолда тонг оттирган бўлса, Аллоҳ таоло унга жаннатнинг икки эшигини очади*”, деганлар (И мом Абу Довуд ва И мом Ибн Можа ривояти).

Ота-оналаримизни рози қилиб, дуоларини олиб яшаш ҳаммамизга насиб этсин.

**Камолиддин ҳожи ЖАМИЛОВ,
Сариосиё тумани**

Садақанинг фойдалари

Исломда закот, хирож, ушр, фитр садақа ва хайр-эҳсонлар “садақот” (садақалар) деган сўз билан ифодаланади (*Бақара сураси*, 271-, 276-; *Тавба сураси*, 58-, 60-, 79- ва 104-оятлар).

Аллоҳ таоло бундай марҳамат қиласди: “Садақаларингизни агар ошкора берсангиз, жуда яхши. Бордию камбағалларга пинҳона берсангиз – ўзингиз учун янада яхшироқдир ва (У) гуноҳларингиздан ўтар. Аллоҳ қилаётган (барча) ишларингиздан хабардордир” (*Бақара сураси*, 271-оят).

Ушбу ояти каримада садақани ошкора қилиш ҳам, маҳфий қилиш ҳам мақтамоқда. Бу ҳақдаги бошқа оят ва шаръий далилларни ўрганиб чиқсан уламоларимиз хулоса қилиб айтадилар: “Садақа фарз бўлса, уни ошкора қилиш яхши, чунки бу ҳолда Аллоҳнинг амрига тоат ошкора кўринади ва ҳақдор бўлмаган кишиларга ҳам тушиб қолишининг олди олинади. Агар садақа ихтиёрий бўлса, уни маҳфий қилган яхши: риёдан ва манманликдан холи бўлади. Садақанинг энг ҳақдори камбағал-фақир кишилардир. Исломда садақанинг жорий қилиниши ҳам ўша тоифанинг ҳимояси ва ёрдами учун бўлган.

Расулуллоҳ соллаллоҳу алайҳи ва саллам: “Садақа қилишга шошилинг. Чунки балолар (офатлар) садақа томонга қадам қўя олмайди. Яна садақа қилишга шошилинг, чунки садақа балони қайтаради ва балонинг (ерга) тушишини тўхтатади”,



деганлар (*Имом Байҳақий ривояти*).

Амалга оширилаётган хайрли ишлар, чин дилдан улашилаётган совғаю эҳсонлар, ихлос-ла қилинаётган эзгу дуолар сабаб Аллоҳ таоло юртимизга тинчлик-осойишталик, хонадонларимизга қут-барака, оғият ато қиласди.

Садақанинг булардан бошқа яна бир қанча фойдалари бор. Куйида уларни санаб ўтамиш. Садақа:

- 1) жаннат эшикларидан биридир;
- 2) Қиёмат куни ўз соҳибиға соябон бўлади;
- 3) қабрда енгиллик бўлади;
- 4) нафсни тарбиялайди;
- 5) гуноҳларга каффарот бўлади;
- 6) хурсандчиликка сабаб бўлади;
- 7) дуо қабул бўлишига сабаб;
- 8) балони қайтаради;
- 9) умрни узайтиради;
- 10) ўт тушишидан, сувда чўкишдан, ўғри уришидан ва ёмон ўлимдан соя бўлади;
- 11) садақа қилувчи киши одамлар меҳрини қозонади;
- 12) ризқ зиёда бўлишига сабаб бўлади;
- 13) нусратга сабаб бўлади;
- 14) садақа қилаётганингизда маблағларингизни йўқотаётган бўлмайсиз, балки уни бошқа пайт учун ўзингизга жўнатаётган бўласиз;
- 15) садақа берадиган одамнинг молига фаришталар барака тилаб дуо қиласди;
- 16) Парвардигорнинг ғазаби сўнишига сабаб бўлади;
- 17) садақа – садақа берувчининг шайтонлар устидан ғалабасидир;
- 18) садақа – садақа берувчининг қувончига сабабчиидир;
- 19) садақа Рамазон ойида тутилган рўзани муқаммаллигига сабаб бўлади;
- 20) садақа берадиган хонадонга Аллоҳ таолонинг раҳмати ёғилади.

Иброҳимжон ИНОМОВ
тайёрлади.

Мундарижас



ДОЛЗАРБ МАВЗУ
“Суннийман...” дегувчи
мазҳабсизлардан огоҳ бўлинг!



ЁШЛАР ТАРБИЯСИ
“Инстасамка” ва “инстасамис”га
айланаётган ёшлар фожиаси



ЁМОНЛИКДАН ҚАЙТАРИШ
Жонини берса беради, лекин...



МАЬНАВИЙ МЕРОС
Шайх Муҳаммад Содиқ
Муҳаммад Юсуф асарларида
тасаввух тарғиботи



САОДАТ АСРИГА САЁХАТ
Бадр ғазоти



МУНОСАБАТ
Бозордаги озорлар



ЯХШИЛИККА ЧАҚИРИШ

Хақнинг розилиги ота-она розилигида	1
УБУДИЯТ	
Садақанинг фойдалари	2
САҲОБАЛАР ҲАЁТИ	
Менинг билганимни билганингизда эди... ..	4
ИБРАТЛИ ҲИКОЯ	
Бандалигимга ярашмайди... ..	5
ДИНИМИЗНИ ЎРГАНАМИЗ	
Амаллар кушандаси	6
МАКТУБЛАРДА МАНЗАРАЛАР	
Оқ нон	7
МЕРОС	
Ўзбек тилидаги энг йирик тафсир	9
САҲОБАЛАР ҲАЁТИ	
Тавбаси қабул қилинган саҳоба	10
ТАФСИР	
Аҳиллик ва бирдамлик асоси	14
МАСАЛА	
Сўраган эдингиз	16
МУРУВВАТ	
Ҳимматли инсон	19
ҚУРЬОН ВА БИЗ	
Муқаддас китобга доир илмлар	20
ТАДҚИҚОТ	
Навоийнинг икки тарихий асари	21
ДУНЁДАН ДАРАКЛАР	
Ислом ва олам	22
БУЮКЛАРДАН САБОҚЛАР	
Етти муборак таълим	24
ШЕЪРИЯТ	
Йўл олдим ўзимдан Сени ахтариб... ..	26
МУҚАДДАС ҚЎРҒОН	
Таъминот ота зиммасида	28
НАБИЙЛАРНИНГ ВОРИСЛАРИ	
Муҳаққиқ аллома Шуайб Арнаут	29

عن أبي ذر الغفاري رضي الله عنه قال: قال رسول الله صلى الله عليه وسلم: «إِنِّي أَرَى مَا لَا تَرَوْنَ، وَأَسْمَعُ مَا لَا تَسْمَعُونَ، أَطَّتِ السَّمَاءَ، وَحَقَّ لَهَا أَنْ تَطِّ، مَا فِيهَا مَوْضِعٌ أَرَبَعْ أَصَابِعَ إِلَّا وَمَلَكٌ وَاضْعَجْ جَبَهَتُهُ لِلَّهِ سَاجِداً، وَاللهُ لَوْ تَعْلَمُونَ مَا أَعْلَمُ لَضَحِكَتُمْ قَلِيلاً، وَلَبَكَيْتُمْ كَثِيرًا، وَمَا تَلَدَّذَتُمْ بِالنِّسَاءِ عَلَى الْفُرْشِ، وَلَخَرَجْتُمْ إِلَى الصُّعُدَاتِ تَجَارُونَ إِلَى اللهِ، لَوْدِدْتُ أَنِّي شَجَرَةٌ تُعَصَدُ». (رواه الترمذی)

Менинг билганимни билганингизда эди...

Маъноси: «Абу Зар розияллоҳу анхудан ривоят қилинади. Расулуллоҳ соллаллоҳу алайҳи ва саллам дедилар: “Албатта, мен сиз кўрмаган нарсаларни кўраман ва сиз эшитмаган нарсаларни эшитаман. Осмон ингради ва унинг инграши ҳақ эди. Унда тўрт панжса сиғадиган ҳар бир жойда битта фаришта Аллоҳга сажса қилиб пешонасини қўйган. Аллоҳга қасам, агар менинг билганимни билганингизда эди, албатта, оз қулиб, кўп ииғлаган бўлардингиз. Тўшакларда аёллар билан ишрат қилмаган бўлардингиз. Даству саҳроларга чиқиб, Аллоҳга зорланган бўлардингиз! Қани эди, кесилиб ташланаидиган дараҳт бўлсан”, дедилар» (Имом Термизий ривояти).

Пайғамбаримиз соллаллоҳу алайҳи ва салламнинг шу ва бошқа бир неча ҳадисларида қўпчилик инсонлар кўра олмайдиган нарсаларни кўриб, аксарият одамлар эшита олмайдиган нарсаларни эшитишларини таъкидлаганлар. Набий алайҳиссаломга берилган бу хислат Аллоҳнинг у зотга улуғ инъомидир. Ана шу инъом туфайли Расулуллоҳ кўплаб инсонларнинг иймон билан шарафланишига сабабчи бўлганлар.

Мазкур ҳадис тўлиғича тақво, зуҳд, вараъ ҳақидадир. Уни ўқиб, англаб, Набий алайҳиссалом биз эшита олмаган, кўра олмаган, билмаган нарсаларимизни билишини англаш орқали у зотга меҳримиз,



муҳаббатимиз янада ошиб бораверади. Тақводор ва зоҳид бўлиш учун инсон ўта ҳассос, қўпчилик ҳис қилмайдиган нарсаларни ҳис қилиши керак.

Шу билан бирга, “Ҳақиқатан, Биз Қуръонни зикр (эслатма) учун осон қилиб қўйдик. Бас, эслатма оловчи борми!” (Қамар сураси, 17-, 22-, 32- ва 40-оятлар) оятига мувофиқ Қуръони каримни тадаббур қилишимиз, Раббимиз яратган маҳлуқотларни тафаккур қилишимиз лозим. Ана шу йўлни тутган баъзи кишилар ўз избодатлари ва саъӣ-ҳаракатлари билан муайян даражага эришиши мумкин.

Набий алайҳиссалом: “Албатта, мен сиз кўрмаган нарсаларни кўраман ва сиз эшитмаган нарсаларни эшитаман”, деб ўша нарсалар нима эканини ҳам баён қилмоқдалар: “Осмон ингради ва унинг инграши ҳақ эди”. Осмон худди уловга оғир юк юкланганди, уни кўтаришда

қийналиб кучаниб овоз чиқаргандек овоз чиқарди. Осмоннинг инграшига сабаб шуки, “*Унга фаришталар тўрт панжса сиғадиган жой ҳам қолдирмай тўлдилар. Ҳаммалари Аллоҳга сажда қилиб пешоналарини қўйдилар*”. Шу издиҳом ва оғирлик осмоннинг инграшига сабаб бўлди.

“...Аллоҳга қасам, агар менинг билганимни билганингизда эди, албатта, оз қулиб, кўп йиғлар эдингиз...” Биз Ислом уммати кўп нарсаларни билмаганимиз учун кўп қулиб, оз йиғлаймиз. Аллоҳ таоло Қуръони каримда огоҳлантиради: “*Бас, қилган касблари туфайли оз қулиб, кўп йиғласинлар*” (*Тавба сураси, 82-оят*).

“Тўшакларда аёллар билан ишрат қилмаган бўлар эдингиз”. Чунки билмаган нарсаларимизнинг даҳшати бизни бошқача қилиб қўяди. Шу боис ҳою ҳавасни йиғишириб қўйиб, ҳар бир нарсани меъёрида бажариш лозим. Шундагина “...дашту саҳроларга чиқиб Аллоҳга зорланган бўлардингиз...” сўзига риоя қилиб, Аллоҳ таолодан ўзга паноҳ йўқлигини англаб етамиз.

Фатҳ сурасининг 2-: “(Бу фатҳ) Сиз учун Аллоҳнинг олдинги ва кейинги гуноҳларингизни кечиши... учундир” оятига мувофиқ олдинги ва кейинги гуноҳлари афв этилган бўлса-да, Набий соллаллоҳу алайҳи ва саллам: “*Қани эди, кесилиб ташланадиган дараҳт бўлсам*”, деб орзу қилганлар.

Бундан Пайғамбаримиз алайҳиссалом кўрган ва билган нарсалар жуда даҳшатли экани аёнлашади. Биз буни унутмаслигимиз лозим. Чунки мўмин киши хавф (қўрқув) ва ражо (умид) орасида бўлиши керак. Шунда Аллоҳ таоло ният ва ихлосимизга яраша мақом ва даражаларимизни кўтаради, иншоаллоҳ.

Манбалар асосида
Толибжон НИЗОМ тайёрлади.



Бандалигимга ярашмайди...

Хуросон волийси Абдуллоҳ ибн Тоҳир замонида миршаблар бир мусулмонни ўғрилиқда айблаб, волий ҳузурига олиб келдилар. Волий ишни ўргангач, уни ҳибсга олдириди.

Маҳбус маҳзун ҳолда намоз ўқиб: “Аллоҳим, айбсиз эканимни фақат Сен билласан! Ёлғиз Сен мени бу балодан қутқара оласан! Ёрдам бер”, деб дуо қилди.

Шу кеча волий туш кўрди. Тушида тўрт алпқомат одам келиб тахтини тўнкараётган экан. Ўрнидан туриб, таҳорат олди, ибодат қилди ва яна ухлади.

Бироқ яна ўша тушни кўриб, қўрқув ичида үйфонди. Дарҳол зиндан бошлигини чақириб, у ерда бирор мазлум бор-йўқлигини сўради.

– Билмайман, – деди у. – Бироқ бир киши тун бўйи намоз ўқиб, кўзёш тўқди.

Волийнинг амрига биноан уни келтиришди. Ҳукмдор унинг сўзларини тинглаб, гап нимада эканини англади ва узр сўради:

– Сени ранжитдик, биздан рози бўл. Бу минг кумуш тангани биздан ҳадя сифатида қабул қил. Агар бирор эҳтиёжинг бўлса, тўғри ҳузуримга кел.

– Рози бўлдим, ҳадянгизни ҳам қабул қилдим. Бироқ ҳожатимни сўраш учун ҳузурингизга келмайман!

– Нега? – ҳадик билан сўради волий.

– Чунки мендек бир ғариб учун сиздек ҳукмдорнинг тахтини бир неча бор ағдарган Раббимни қўйиб, тилагимни сиздан сўрай олмайман. Бу бандалигимга ярашмайди!

Нигора АБДУМУХТОР қизи тайёрлади.

Амаллар күшандаси

Уламолар солиҳ амалларни ҳабата қилувчи, савобини йўққа чиқарувчи иллатларни санаб ўтганлар. Ҳатто буни ақида китобларига ҳам киритганлар. Бундай иллатлардан бири риёдир.

“Риё” сўзи кўз билан кўриш, назар солиш ва одамлар кўрсин деган маъноларини англатади. **Ибн Ҳажар Асқалоний** риёни қуидагича таърифлайди: “Риё одамлар кўриб, эгасини мақташлари учун ибодатни изҳор қилишдир”. **Имом Таҳонавий** раҳимаҳуллоҳ: “Риё – яхшиликни бошқалар кўрсин учун қилиш. Унда холис ният ва ихлос бўлмайди”, деган.

Демак, риё амалнинг аслини эмас, балки савобини ҳабата қилади. Яъни амал шариатга мувофиқ бўлса-да, унга риё аралашгани учун қабул бўлмайди. Имом Абу Ҳанифа раҳимаҳуллоҳ “Фикхул акбар”да: “*Бирор ишга риё аралашса, унинг ажрини йўқ қиласи*. *Шунингдек, ғуурланиш ҳам*”, деган. Имомнинг: “*Бирор ишга риё аралашса*” деган лафзидан уламолар икки хил ҳикмат олишган.



Биринчиси, киши бирор амални қилаётганида қалбига риё ораласа ва бундан кўнгли таскин топса, амали қабул, аммо унинг савоби қолмайди. Иккинчиси, киши амални бажарib бўлганидан кейин унинг қалбига риё ораласа, лекин дилида бу иллатта нисбатан мойиллик бўлмаса, савобни кетказмайди.

Расулуллоҳ соллаллоҳу алайҳи ва саллам риёни маҳфий ширк деб атаганлар. Абу Саид Худрий розияллоҳу анҳу ривоят қиласи: «Биз Масих, Дажжол ҳақида сўзлашиб ўтирганимизда, Набий алайҳиссалом хузуримизга чиқиб: “*Сизларга Масих Дажжолдан ҳам кўпроқ қўрқадиган нарсам ҳақида хабар берайми?*” дедилар. Биз: “Ҳа, эй Аллоҳнинг расули”, дедик. У зот соллаллоҳу алайҳи ва саллам: “*Маҳфий ширк. Киши туриб бирор кўриши учун намоз ўқшиши*”, дедилар» (*Имом Ибн Можа ва Имом Ҳоким ривояти*).

Иллатлар орасида риё сингари савобни кетказувчилардан яна бири ужбидир. Имом Ғаззолий раҳимаҳуллоҳ: “Ужб – неъмат берувчини эсидан чиқариб, неъматга суюниб қолишидир”, деган.

Ужб ҳам риё каби салбий сифатлардан. Зеро, риёкор амалига бошқаларни уларнинг розилигини кўзлаб, Аллоҳ таолога шерик қилса, ужбчи Аллоҳ таолога ўз нафсини шерик қиласи.

Уламолар яна бир нозик жиҳатга эътибор қаратади. Кишининг ибодатига риё аралашса, амалнинг барини ҳабата қиласими ё риё аралашган қисминими, ёки кучли тарафга ҳукм қилинадими, деб баҳс қилдилар. Бу ҳақда “Мухитул Бурҳоний” китобида қуидагича келади: “Бир киши намозини Аллоҳ таолонинг розилиги учун бошласа, сўнг қалбига риё аралашса, намози аввалида қандай бошлаган (нимани ният қилган бўлса) шундайдир. Зеро, риёдан сақланиш мушкулдир” (5-жилд, 314-бет).

Юқоридаги изоҳ амалда риё ва ихлос teng, кўп ёки кам бўлган ҳолатларни ўз ичига олади. Аммо Имом Ғаззолий раҳимаҳуллоҳ: “Ихлос билан риё teng келса, иккиси ҳам ҳабата бўлади. Натижада қилган амалига ихлоси учун савоб ҳам олмайди, риёси учун азобга ҳам қолмайди”, дейди. Изз ибн Абдуссалом раҳимаҳуллоҳ: “Ихлоси риё билан teng ёки устун келса, савобга эга бўлмайди”, дейди.

Бу ерда ўрганилиши лозим бўлган жиҳат бор. Агар риё амалнинг аслида бўлса, масалан, бир киши одамлар билан намоз ўқииди, ёлғиз қолса, ўқимайди. Шу ҳолатда амалининг аслида риё борлиги сабаб унга савоб йўқ, балки риёси учун гуноҳ бор. Агар ўқиган намози фарз бўлса, зиммасидан соқит, охиратда ундан сўралмайди. Мана шу ҳолат уламоларнинг: “Фарз амалда риё йўқ”, деган гапларининг маъносидир. Намози нафл бўлса, гёё у намоз ўқимагандек, риёси учун азобга дучор бўлади. Буни аллома Ибн Обидин “Раддул муҳтор”да, Имом Фаззолий “Иҳёу улумиддин”да таъкидлаган.

Имом Шофеъий раҳимаҳуллоҳ бундай дейди: “Агар амалингга ужб аралашишидан қўрқсанг, кимни рози қилмоқчи бўлаётганинг, қандай савобга эришмоқчи эканинг, қайси азобдан қочаётганингу қайси оғиятга шукр қилаётганинг ва қайси мусибатни ёд этаётганингга назар сол. Агар шу амаларнинг бирортаси хақида тафаккур қилсанг, амалинг кўз ўнгингда арзимас бўлиб қолади”.

Абу Бакр Сиддик розияллоҳу анҳу ривоят қилади. «Расулуллоҳ соллаллоҳу алайхи ва саллам: **“Ичингиизда ширк чумолининг ўрмалашидан ҳам маҳфиyroқдир. Эй Абу Бакр, сени ўшанинг каттасию кичигини ҳам кетказадиган нарсага далолат қиласми? Сен: “Ё Аллоҳ! Билган ҳолимда Сенга бирор нарсани шерик қилишидан паноҳ беринингни сўрайман ва билмасдан қилган гуноҳларимга Сендан мағфират сўрайман”, дегин”,** дедилар» (Имом Аҳмад ривояти).

Имом Бухорий номидаги Тошкент ислом институти “Ақоид ва фиқҳий фанлар” кафедраси ўқитувчиси Абдуллоҳ АБДУЛГОФИР тайёрлади.

ОҚ НОН

Яқинда бир зиёфатда қўшни давлатдан келган меҳмон ҳам иштирок этди. У дастурхондаги тўкин-сочинликни кўриб, бир воқеани сўзлаб берди.

Ўтган асрнинг тўқсонинчи йиллари. Юртимизда 3–4 ой нотинчлик бўлиб, ҳаммаёқдан файз кетди. Егуликлар анча тортилди. Бозорлар, озиқ-овқат дўконлари ҳувиллаб қолган, айrim озуқалар бўлса ҳам, жуда қиммат эди. Дўконларда фақат жон бошига қора нон тарқатиларди.

Бу орада 11 яшар қизим касал бўлиб колди. Шифокор камқувват бўлиб қолибди деб дори-дармон буюрди, яхши едириб-ичириши тавсия этди. Шукрки, уйда озиқ-овқатдан муаммо йўқ. Ўндан ортиқ қўй-қўзилар, товуқ, ғоз, майизу ёнгоққача ғамлаб қўйгандим. Лекин қизимни буларга иштаҳаси бўлмади. Доим, “Дада, оқ нон ейман”, дерди. Афсуски, оқ нонни ҳеч қаердан топиб бўлмасди. Қизим ҳар сафар нон сўраганида ичимдан зил кетардим. Бир кун жондан ўтиб, битта катта қўйни сотдим. Уйдаги бор пулни чўнтакка солиб, қизимга “оқ нон топиб келаман” дея шаҳар марказига йўл олдим. Шаҳарда кирмаган новвойхоналар, дўконлар, бозорлар қолмади. Оқ нон дегани ҳеч қаерда йўқ. Айrim сотувчиларга битта қўйнинг пулини ҳам таклиф қилдим. Аммо имкони бўлмади. Шаҳардан чиқиб, қўшни вилоятга йўл олдим. Шу-шу кечгача оқ нон дея кирмаган эшигим қолмади. Уйга ҳориб қайтарканман, кўзимдан ёш чиқиб кетди. Қизимга нима дейишни, уни қандай хурсанд қилишни билмасдим...

Шукрки, бу кунлар ўтди-кетди. Бугун дастурхонимиз тўкин. Лекин оқ нон излаган куним кечагидек ёдимда.

**Тошиблат АШУРОВ,
Когон шаҳри**

“СУННИЙМАН...”

дегувчи мазҳабсизлардан огоҳ бўлинг!

Таниқли ҳанафий олимни ва тадқиқотчиси Мавлоно Абдулҳай Лакнавий раҳимаҳуллоҳ мусулмон одам ҳанафий бўлса ҳам, лекин бузук ақидали бўлиши мумкинлигидан огоҳлантириб: “Демак, қанча ҳанафийлар бор: фуруъда (яъни фикҳий масалаларда) ҳанафий, ақида жиҳатдан эса мўтазилий. Қанчадан қанча ҳанафийлар бор, улар фуруъ жиҳатидан ҳанафий, аслида эса, муржиий ёки зайдий”, деган.

Машҳур муфассир ва ҳанафий олим Абулқосим Маҳмуд Замахшарий раҳимаҳуллоҳ вафоти олдидан мўтазилийликдан қайтиб, тавба қилгани манбаларда зикр этилган бўлса-да, бироқ унинг мўтазилий бўлгани ҳолда ҳанафий олимни сифатида қадр топгани, ҳанафий фикҳида “Руъус ал-масоил” номли асар битгани маълум. Ҳанафий фикҳида эътибор топган “ал-Қуня”, “ал-Ховий”, “ал-Мужтабо” сингари фикҳий манбалар битган Нажмиддин Зоҳидий раҳимаҳуллоҳ ҳам мўтазилий бўлгани нақл қилинади.

Маҳмуд Замахшарий раҳимаҳуллоҳнинг “ал-Кашшоф” тафсири Қуръони каримга ёзилган тафсирларнинг энг машҳури хисобланади. Унда Қуръони каримнинг маънолари, сўз жилваланишлари, жумла тузилишлари мукаммаллиги муфассал тарзда берилган. Бироқ ўтмишда мадрасаларда ушбу тафсир охирги босқичда ўқитилган. Чунки унда мўтазилийлик ғоялари сездирилмасдан акс эттирилган, деган фикр мавжуд эди. Шу вақтнинг ўзида аҳли сунна вал жамоанинг машҳур ақидавий манбаси «ал-Ақоид ал-Азудийя» ва унинг Мулла Жалол Давроний раҳимаҳуллоҳ томонидан битилган шарҳи ўқитилган. Яъни, ақидада чалғиши бўлмасин деган мақсад бўлган. Яқин-яқингача устозлардан Асвад маҳдум ва Домла Икромча раҳимаҳуллоҳ “ал-Кашшоф”ни ўқитаётib, “Бўяш меояд!”

(“Ҳиди келмоқда!”) деб қўяр эканлар.

Ўз даврида мўтазилийларнинг раиси бўлган Қози Абдулжаббор раҳимаҳуллоҳ амалиётда шофеъийларнинг катта фақихларидан бири хисобланади.

Ўтмишда яшаб ўтган бу ҳазратлар, гарчи бошқа эътиқодда бўлсалар ҳам, лекин ҳанафий ёки шофеъий мазҳабига сидқидилдан ва ихлос билан амал қилиб келишган. Уларнинг бу мазҳабдаги амалиётлари юзаки бўлмаган, улар Имоми Аъзам Абу Ҳанифа раҳимаҳуллоҳни чинакам хурмат қилганлар, мазҳабига тақлид қилишни вожиб деб хисоблаганлар, буни ўзларининг мўминлик бурчи деб билганлар.

Маҳмуд Замахшарий раҳимаҳуллоҳ “Навобиғ ал-калим” асарида: “Илм ва дин ҳанифий ва ҳанафийдир!”, “Аллоҳнинг Ердаги қозиқлари юксак тоғлар бўлгани каби ҳанафийликнинг қозиқлари Абу Ҳанифа илмлари биландир!” ва “Буюк имомлар ҳанафийлар бўлиб, улар ҳанафий миллатнинг юганлари” дейилган.

Огоҳ бўлайлик: айрим кимсалар одалар кўз ўнгиди, жамоат намозларида, масжидларда гўё шофеъий мазҳабига риоя қилган ҳолда намозларни адо этаётгандек ўзини кўрсатиши мумкин. Аслида-чи: у, ҳақиқатан, шу мазҳаб тартиб-қоидаларига риоя қиляптими? Балки унинг ақидаси бузук, аҳли сунна вал жамоадан оғишган тоифадан бўлиши мумкин.

Буюк аллома Абдулҳай Лакнавий ҳазратлари: “Бирор диёрда қадимдан ҳанафий мазҳабига риоя қилиб келинаётган, адабиётлар ҳанафий мазҳабида чоп этилаётган бўлса, шу юртда яшаётган ҳар бир мўмин-мусулмон ҳанафий мазҳабига риоя қилиши вожиб бўлади”, деган.

“Ҳанафий” деб мусулмон уммати, Ислом дини, Иброҳим алайхиссалом ифтихор қилган мўминлик, муслимликка айтилади.

“Сохта салафийларнинг саёз сабоги”
китобидан.

Ўзбек тилида таълиф этилган илк тафсирлар ҳақида сўз кетганда, Муҳаммад Зариф Кошғарий тафсири ҳам алоҳида тилга олинади. Бироқ бу ҳақда ўзбек тилидаги адабиётларда деярли маълумот учрамайди.

Ўзбек тилидаги ЭНГ ЙИРИК ТАФСИР

Муфассир, қори Муҳаммад Зариф Кошғарий 1872 йили Тошкент шаҳрида туғилган. Қори Муҳаммад Зариф Гулжа шаҳрида фаолият юритган, 1959 йилда шу ерда оғир хасталик туфайли вафот этган.

Олим дастлабки таълимини Бухоро мадрасаларида олади. Кейинчалик Кошғарга кўчиб боргач, ўзбек тилида Куръони карим тафсирини ёзишни бошлайди. Тафсирининг фақат 30-жузи Кошғар шаҳрида 1937 йилда нашр қилинган. Нашр қилинмаган қўллўзма нусхаси Шарқий Туркистоннинг Гулжа шаҳрида сақланади. Ушбу нашр Қатар пойтахти Доҳа шаҳрида “Али ибн Али” нашриётида оғсет босма усулида 1987 йилда 2000 нусхада чоп этилган.

Туркиялик баъзи тадқиқотчилар Муҳаммад Зариф Кошғарий ва унинг тафсири ҳақида қўйидаги маълумотларни келтиришади: «Муҳаммад Зариф суралар тафсирини бошлидан олдин суранинг қаерда нозил бўлгани, нозил бўлиш сабаби, сурадаги оят ва ҳарфлар сони ҳақида маълумот беради. Масалан, Наба сурасини тафсир қилар экан, бундай келтирилади: “Ан-Наба сураси Маккада нозил бўлган, 40 та оят, 130 та сўз, 690 та ҳарфдан иборат”. Шу билан бирга муфассир айрим суралар тафсирида фақат сура нозил бўлган жой ва оятлар сони ҳақида баён қилиб, агар суранинг нозил бўлган жойи ҳақида ихтилоф бўлса, алоҳида маълумот бериб ўтади. Баъзи суралар тафсирининг охирида тафсир тамомланган вақт кўрсатилиб, баъзида тугалланган сана кўрсатилмай,

дуо билан якунланган.


Муҳаммад Зариф тафсирида дастлаб оятнинг арабча матнини келтириб, кейин маъноларини ўзбек тилига таржима қиласди. Агар оятнинг нозил бўлиш сабаби мавжуд бўлса, уни баён қиласди».

Тафсирида Пайғамбари миз алайҳиссалом ҳадисларига, саҳоба ва тобеинларнинг қарашларига алоҳида эътибор берилган. Жумладан, Ибн Аббос, Ибн Масъуд, Ибн Зубайр, Мужоҳид, Қатода, Ибн Жарир Табарий, Фахриддин Розий, Қози Байзовий каби машҳур олимларнинг қарашлари тез-тез учрайди.

Бундан ташқари, Муҳаммад Зариф ўз тафсирида Ислом илмларининг барча мавзуларига, фикҳ, калом, ҳадис, усул, луғат, нахв, қироат, араб, форс ва уйғур шеърияти, риторика каби илм-фаннынг турли соҳаларига мурожаат қиласди.

Таъкидлаш жоиз, ушбу тафсир равон тили, илф-фаннынг барча соҳаларини қамрагани, ҳар бир суранинг шархи кенгроқ ёритилгани билан ажralиб туради. Шу билан бирга, тафсирининг Гулжа шаҳрида мавжуд дейилган бошқа қисмлари ҳам тафсири “Аъмма ятасаалун” каби 735 саҳифали китоб эканини инобатга олсан, ушбу тафсир ҳажм жиҳатидан бошқа ўзбек тилидаги тафсирлардан анча катта экани маълум бўлади.

Бахтиёр СОДИКОВ,
Ўзбекистон халқаро ислом академияси
магистранти



Тавбаси қабул қилинган саҳоба



Ансорлик саҳоба Каъб ибн Моликнинг ҳаёти ажойиб ва сидқ-ростгўйлик ила зийнатланган бир қиссадир. Бу қиссани ҳеч ким унинг ўзичалик ички ҳис-кечинмалари билан тўлиқ ва батафсил баён этиб бера олмайди. Бу саҳоба найзаси ва тили билан Исломни ҳимоя қилди. Аллоҳ таоло у билан шериклари ҳақида эртаю кеч доимо тиловат қилинадиган оятни нозил қилди, бу тиловат қиёматгача давом этажак. У “Расулуллоҳ алайҳиссаломнинг шоири” деган рутбага сазовор бўлди.

Каъб айтади: «Расулуллоҳ соллаллоҳу алайҳи ва саллам чиққан ғазотлардан бирортасида орқада қолиб кетмаган эдим. Биргина Табук ғазотида шундай бўлиб қолди. Бир вақт Расули акрам билан саҳобалари йўлга отландилар. Ҳар қанча изларидан этиб оламан десам ҳам, бу иш менга насиб этмаган экан. Сўнг бу ишимдан ғам-қайғуга ботдим. Уйимдан чиқиб, одамлар орасида бўлсам, ғамим яна зиёда бўлаверарди. Табукка этиб бормагунча Расули акрамнинг эсларига тушмабман. У ерга етгандарида Каъб ибн Моликка нима бўлди, деб сўрабдилар.

Бир куни у зот Мадинага қайтаётгандарини эшитиб, бадтар хунобим ошди. Ўзимга-ўзим у зотга қандай узр айтаман, эртага ғазбларида қандай қутуламан,

дердим. Мадинага яқинлашиб қолибдилар, деган гапни эшитганимда баҳона топиш ниятим мендан чекинди. Билдимки, ҳеч қачон ёлғондакам бир баҳонани тўқиб, у зотнинг ғазабидан қутулолмайман, нима бўлса бўлди, борини ва ростини сўзлашга қарор қилдим. Расулуллоҳ алайҳиссалом бирор жойдан қайтсалар, масжидга кириб, у ерда икки ракат намоз ўқиб олардилар. Намозни адо этиб бўлганларидан сўнг менга ўхшаб ғазотга бормай қолганлар у зот ҳузурларида қасам ичиб, узрларини айтишди. Улар саксон киши атрофида эди. Расулуллоҳ узрларини қабул қилиб, улар учун мағфират сўрадилар. Мен ҳузурларига бориб салом берганимда табассум қилдилар. Сўнг яқинроқ кел, дедилар. У зотнинг олдиларига яқинроқ борганимда:

– Эй Каъб, сен нега чиқмадинг? Сен ўзингга улов сотиб олмаганимдинг? – дедилар.

Мен бу гапдан довдираб:

– Аллоҳга қасамки, эй Аллоҳнинг Расули, агар сиздан бошқа кишилар олдида ўтирганимда ўйлаб топган узримни айтиб, ғазабидан қутулиб қолган бўлардим. Мен шуни аниқ билдимки, бугун сизни рози қилиш учун ёлғон гапирсам, Аллоҳнинг ғазабига йўлиқаман. Агар сизга ростини айтсан, сиз қилган ишимдан ғазбланаисиз.

Албатта мен бунда Аллоҳнинг афвини умид қиласман. Аллоҳга қасамки, эй Аллоҳнинг Расули, қилган ишим учун айтадиган бирор бир тайинли узрим йўқ. Бу ғазотга чиқишга куч ва имконим етарли эди, – дедим. Шунда Расулulloҳ: “Аммо бу рост гапирди”, деб менга: “Боравер, токи Аллоҳ сен ҳақингда бирон ҳукм чиқармагунча, кўзимга кўринмай тур”, дедилар. Мен масжиддан чиқиб кетдим.

* * *

Орадан кўп ўтмай Расулulloҳ ғазотга бормай қолганлардан мен билан яна икки киши билан гаплашишни ман қилиб қўйдилар. Одамлар биздан ўзларини тортиб, муомалалари ўзгариб қолгач, бутун қўл-оёғимдан мадор кетди. Шу ҳолатда эллик кун ўтди. Икки шеригим кун бўйи ўз уйида вақтларини йиғлаб ўтказишарди. Мен ёш ва ғайратли эдим. Мусулмонлар билан нағозга чиқар, бозорларни айланиб юрадим. Лекин менга ҳеч ким бир оғиз чурқ этмасди. Шу билан ўйламаган, тушимга ҳам кирмаган ишлар бўлиб ўтди. Мен ўзимча бошим оққан тарафга кетаверар эдим. Тўсатдан Шом аҳлидан бўлган Ироқ диёрида яшайдиган бир набатий (набтга мансуб киши): “Ким Каъб ибн Моликни кўрсатиб қўяди?” деб қолди. Одамлар мен томонга ишора қилишди. У эскидан танишимдек олдимга келиб, Фассон подшохининг мактубини узатди. Мактубни очиб қарасам, унда: “Аммо баъд. Менга соҳибинг сенга қилган жафоллар хабари етиб келди. Бизга қўшил, биз сенга қарашамиз”, дейилган эди. Мактубни ўқигач, бу ҳам бир бало бўлди, дедим. Сўнг мактубни ёнимда ёниб турган тандирга ирғитдим.

* * *

Аммо қирқ биринчи куни Расулulloҳ ҳузурларидан бир киши келиб: “Расулulloҳ сенга хотинингдан узоқ бўлишингни буюрдилар”, деб қолди. “Мен уни талоқ қилайми ёки нима қилай?” дедим. У, йўқ, ундан узоқ бўл, унга яқинлик қилма, деб тайинлади. Икки шеригимга ҳам шундай амр юборилди. Буни эшишиб аёлимга: “Аллоҳнинг Ўзи бу ишни бир ёқли қилмагунча ота-онанг олдига бориб, улар билан яшаб тур”, дедим.

У ота-онаси олдига кетди. Яқинларимдан бири менга сен ҳам Расули акрамдан аёлинг тўғрисида изн сўрасанг бўларкан, деди. Ҳилол ибн Умайяга рухсат берганларида сенга ҳам изн бўлиб қолар, дейишли. Мен ҳеч қачон бундай қилмайман. Мен ёш бўлсан, Расулulloҳ менга нима дейдилар, билмасам, дедим.

Эллигинчи кун бомдодни ўқигандан кейин бир жарчи баланд овозда: “Эй Каъб ибн Молик, хушхабар, эй Каъб ибн Молик, хушхабар”, деб қолди. Бу хабарни эшитган заҳоти дарров чўкка тушиб Аллоҳга сажда қилдим. Менга яхшилик етганини билдим. Одамлар мендан суюнчи олгани кимўзарга югуриб қолиши. Энг олдингиси отда етиб келди. Икки шеригим олдига ҳам суюнчи сўраб боришибди. Суюнчига устимдаги кийиб юрган кийимимни ечиб бердим. Ўша чоғда суюнчига бериш учун ёнимда бошқа нарсам йўқ эди. Иштон-қўйлакни бирордан омонатга олиб кийдим-да, Расулulloҳ алайҳиссалом томон югурдим. Одамлар йўл-йўлакай мени тўда-тўда бўлиб, бағирларига босиб, тавbam қабул бўлгани билан табриклаб: “Эй Ибн Молик, Аллоҳ тавбангни муборак қилсин”, дейиши. Мен у зотга салом берганимда, юзлари суурдан ял-ял ёниб: “Эй Каъб, онадан туғилганингдан бери кўрмаган яхшиликдан шод бўл”, дедилар. Мен: “Бу яхшилик сизданми ёки Аллоҳ азза ва жалладанми?” дедим. У зот: “Албатта Аллоҳдан”, дедилар. Мен: “Тавbam қабул бўлганидан барча молимни Аллоҳ ва Унинг Расули учун садақа қилдим”, дедим. У зот: “Молингдан бир қисмини олиб қолсанг, ўзингга яхши бўлади”, дедилар. Мен: “Ундан бўлса, Хайбардаги улушимдан қолган барча молимни садақа қиласман. Эй Аллоҳнинг Расули, Аллоҳ мени ростгўйлигим туфайли бу балодан қутқарди. Яна тавbamга белги шуки, то ўлгунимча ҳеч қачон ёлғон гапирмайман” дедим».

Расулulloҳнинг шоири Каъб ибн Молик Ансорийдан Аллоҳнинг Ўзи рози бўлсан.

Манбалар асосида
Бобомурод ЭРАЛИ тайёрлади.

“ИНСТАСАМКА”

ва “инстасамис”га айланаётган ёшлар фожиаси

Миллатнинг таназзулга юз тутиши, жамиятда бегоналашув, виртуаллашув, “мен концепцияси” каби иллатларни ёшлар онгига сингдиришининг янги усул ва механизмларини тарғиб қилаётганлар кимлар ва биз фарзандларимизни улардан қандай ҳимоя қилишимиз керак?

Бу ҳақда Республика Маънавият ва маърифат маркази ҳузуридаги Ижтимоий маънавийтадқиқотлар институти кичик илмий ходими, Ўзбекистон миллий университети таяни докторантни **Нигора ҲУСАНОВА** билан сұхбатлашидик.

– Бугун Farbda тарқалаётган инсонийликка зид ғояларини фарзандларимиз учун фожиали жиҳатлари ҳақида гаплашсак...

– Ёшлар орасида Farbning виртуал оламдаги мавқеи орқали турмуш даражасини енгилластириш каби ёт ғоялари қисқа вақт ичиди Ўзбекистонга ҳам кириб келди. Жамиятда ҳеч қандай ақлий ёки жисмоний меҳнатларсиз ҳам осон даромад топиш деган ғоя аксарият ёшларнинг онгини эгаллади.

Бунга ижтимоий тармоқлар орқали танилган “Инста-юлдузлар” томонидан тармоққа жойланган ва бугунги кунда кишилар ўртасида урфга айланаётган “MEM”лар мисол бўлади. “MEM” – ижтимоий тармоқларда машҳур сўз, ибора, сурат, видео ёки аудиоларнинг одамлар орасида ҳеч қандай ўзгартиришларсиз маданий ахборотларнинг бирлигини англатувчи тушунча бўлиб, ёшлар ўртасида

оммалашган. Ушбу “MEM”лар, бир қараганда, миллий мерос ва миллатнинг қадриятига ҳеч қандай зарари йўқдек кўринса-да, астасекинлик билан жамиятнинг, миллатнинг тили, дини, эътиқоди, қадрият ва анъаналарини емириб, йўқ қилиб юборади. Чунки маълум бир ёшлар гурухи томонидан ўйлаб топилган бирор-бир “қилик” ёки “ҳаракат” унинг мазмун-моҳиятини англаб-англамай туриб, Ер юзидағи ёшлар ўртасида оммавий тақлид воситасига айлантирилади. Масалан, “атанистлар” белгисини TikTok, YouTube, Instagram каналларида MEM ва челленж даражасида тарқатиш миссияси тўғрисида кўпчилик ота-оналар маълумотга эга эмас.

– “Сатанист” ўзи нима, бу белгининг тарқалиши ёки ёшлар тақрорлашининг қандай салбий жиҳатлари бор?

– “Сатан” сўзи инглиз тилидан олинган бўлиб, “жин”, “шайтон”, “иблис” деган маъноларни англатиб, Ер юзидағи инсонлар орасида иблисга хизмат қилувчи ва инсониятни тўғри йўлдан оздирувчи, иймон-эътиқодини йўқ қилишга қаратилган ҳаракат ҳисобланади. Бу оқим бўйича АҚШнинг Калифорния штатида Антон Левий томонидан илк бор “шайтон черкови” барпо этилган. У “Сатан инжили” номли китоб муаллифи ҳисобланади. Бу йўналиш вакиллари сатанизм ва атеизм тарафдорлари билан бирга ҳаракат олиб боради, уларнинг бош ғояси “дунёни шайтон бошқаради”, деган ақидадир.

Уларнинг Ер юзида тарқалиши ва фаолиятининг энг беозор йўли сифатида мусиқий йўналиш танланган. Бундан ташқари, кичик ва қисқа лавҳалардан унумли фойдаланиш



орқали ўзларининг “сатан белгиси” лавҳанинг қайсиdir қисмида бармоқлари билан намойиш этишади. Бу белгини асосан оммавий рок, металл ва хеви йўналишидаги мусиқий концерт дастурларида уларнинг севимли қўшиқчилари томонидан намойиш этилади ва муҳлислар ўзи билмаган ҳолда ушбу харакатларни тақрорлайди. Бу гурух фаоллари носоғлом муҳитда тарбия топган оиласининг ота ёки онаси ташлаб кетган, гиёхванд, ичкиликка ружу қўйган нотинч оила фарзандларидан ташкил топган.

Иймон-эътиқодга хужумларнинг аксарияти 13–19 ёшгача бўлган болаларда, инсонийлик, раҳмдиллик, меҳрибонлик, беғуборлик, меҳрмуҳаббат каби хислатларини 2–14 ёшгача бўлган болаларда йўқ қилиш учун харакат бошлаб юборилган.

Бугун уларнинг TikTok ва YouTube платформаси орқали қисқа сонияли “Кўк бошли маҳлуқча йўқолди? У шу ерда эмасми?” кўринишидаги роликлари “МЕМ”га айланниши ҳамда “челленж”ларнинг оммалашшиб бориши орқали болалар учун турли ахлоқий бузук ўйинчоқларни оммалаштириш ёки севимли ўйинчоққа айлантириш учун хужумлар уюштирилмоқда.

— Хўши, болалар ўртасида бундай “попит ва антистресс” ўйинчоқларини оммалаштиришдан асосий мақсад нима?

— Мақсад боланинг гўдаклигидан онгига “стресс” сўзини жойлаш ва шакллантиришдир. Ўйлаб кўринг, 3–7 ёшли болада қандай асабий тушкун ҳолат бўладики, уни антистресс ўйинчоқлар билан бартараф этиш лозим бўлса.

Эътибор бериб қарасак, Америка ижодкорлари томонидан яратилган фильм ва мультфильмларда, ҳатто қўшиқларида ҳам руҳий касалликлар билан қаҳрамонларнинг қийналиши тўғрисида лавҳалар тез-тез учраб туради. Бу ҳам ёшларни ўзига оғдиришнинг бир йўлидир.

— Кейинги пайтда инсоний фазилатлар ўрнини жамиятдан бегоналашув, муносабатларнинг виртуаллашуви эгаллаб олмаяптими?

— Ҳақсиз, албатта. Кишиларнинг реал оламдан кўра, виртуал оламдаги фаолият жараёнининг ортиб бориши оқибатида эркак жинс вакиллари билан тенг ҳуқуқлиликни бирдек даъво қилувчи “инстасамка”лар ҳам бугунги кунда ўзининг аёллик шаъни ва қадр-қимматларини бир четга суриб, енгил ҳаёт ва осон пул топиш мақсадида ўзини турли кўринишларда намоён қилишмоқда. “Инстасамка” — “Instagram” сўзининг қисқартмаси “Инста” (инглиз тилида) – фото ва видеоларни алмашиш учун Америка ижтимоий тармоғи, “самка” эса “аёл”, “урғочи” деган маъноларни англатади. Шу ном остида фаолият юритувчи аёллар гурухи TikTok, Instagram, YouTube платформаларида фаолият олиб боришмоқда. Авваллари йигитларимизни Алп ўғлон, Баҳодир, Алпомишга, қизларимизни эса Тўмарису Барчинга қиёслаган бўлсак, замонамиз қизлари энди “инстасамка”, йигитларимиз эса “инстасамис, инстаАлфа, хейтир” каби номлар остида фаолият олиб боришмоқда.

Оммавий маданият Фарбни ўз домига тортиб кетди, аммо кейинги навбат Шарқ мамлакатлари эканини ҳамма бирдек англаш етмаяпти. Бу фақат кийиниши маданияти билан эмас, унда оила, фарзанд, эътиқод, шахснинг ўзлигини англаш масалаларига янгича ёндашув – инсон ўз танаси уники ёки уники эмаслиги тўғрисидаги муаммолар, “Мен концепцияси”, девиант хулқ-атвор, кибержиноятчилик, гиёхвандлик вабоси, одам савдоси, суицид муаммоларидан ташқари, энг оғрикли нуқтаси – инсонлар ўртасидаги меҳр-мурувват каби маънавий қадриятларнинг йўқолишига олиб келмоқда.

— Фарзандларимизни мана шундай ёт мағкуралардан омон сақлаши учун нималарга эътибор беришимиш керак?

— Бунинг учун таълим ва тарбия жараёнинда хотиржамлика берилмаслик талаб этилади. Шу ўринда Президентиимиз Шавкат Мирзиёевнинг: «Агар биз ёлғон ғояга алданганларни ўз ҳолига ташлаб қўядиган бўлсак, эртага четда пайт пойлаб турган қабиҳ ёв келиб, уни ўз ортидан етаклаб кетмаслигига ким кафолат беради?» деб куюниб айтган фикрлари барчамизни ҳушёр торттириши лозим. Ҳақиқатан ҳам шундай. Қачонки биз оиласда фарзанд учун соғлом муҳитни шакллантириб бера олсан, келиб чиқиши мумкин бўлган муаммоларнинг олдини олиш осонроқ бўлади.

Нигора РАҲМОНОВА сұхбатлашиди.
ЎЗА

بِسْمِ اللَّهِ الرَّحْمَنِ الرَّحِيمِ

وَاعْبُدُوا اللَّهَ وَلَا تُشْرِكُوا بِهِ شَيْئًا وَبِالْوَالِدِينِ إِحْسَانًا وَبِذِي الْقُرْبَى وَالْيَتَامَى
وَالْمَسَاكِينِ وَاجْنَارِ ذِي الْقُرْبَى وَاجْنَارِ الصَّاحِبِ بِالْجُنْبِ وَابْنِ السَّيْلِ وَمَا
مَلَكَتْ أَيْمَانُكُمْ إِنَّ اللَّهَ لَا يُحِبُّ مَنْ كَانَ مُخْتَالًا فَخُورًا ﴿٣٦﴾

Ахиллик ва бирдамлик асоси

«Аллоҳга ибодат қилингиз ва Унга ҳеч нарсани шерик қилмангиз! Ота-оналарга эса яхшилик қилингиз! Шунингдек, қариндошлар, етимлар, мискинлар, қариндош қўшниу бегона қўшни, ёнингиздаги ҳамроҳингиз, йўловчи (мусофир)га ва қўл остингиздаги (қарам)ларга ҳам (яхшилик қилинг)! Албатта, Аллоҳ кибрли ва мақтанчоқ кишиларни севмайди» (*Niso suras*, 36-оят).

Аллоҳ таоло ояти каримада бандаларини ўнта яхши амалга буюрмоқда. Уларни адо этиш билан жамиятда соғлом муҳит ҳукм суради, одамлар орасида ўзаро иттифоқлик, ҳурмат ва оқибат юзага келади.

Биринчидан, ёлғиз Аллоҳ таолонинг Ўзига ибодат қилиш, Унга бирор нарсани шерик қилмаслик. Аллоҳни таниган, Унга холис ибодат қиласидиган кишидан ҳеч қачон ёмонлик чиқмайди. Чунки Ислом динида буюрилган барча ибодатларни ихлос ва эътиқод билан адо этадиган инсон гўзал ахлоқу одобларни эгаллаб боради. Аллоҳ таолога ширк келтириш гуноҳларнинг энг каттаси бўлиб, у сабабли киши иймонидан айрилади. Натижада қилган барча тоат-ибодатлари, солиҳ амаллари бесамар ва зое кетади. Аллоҳ таоло Ўзига ширк келтирган ҳолда, тавба қилмай вафот этган кишини кечирмайди: «Албатта, Аллоҳ Ўзига ширк келтириш (гуноҳи)ни кечирмагай ва (лекин) ана шундан бошқа (гуноҳлар)ни Ўзи хоҳлаган (банда)ларидан кечирур. Ким Аллоҳга ширк келтирса, демак, у

улкан гуноҳни тўқиб чиқарибди» (*Niso suras*, 48-оят).

Иккинчидан, ота-онага яхшилик қилиш. Фарзанднинг зиммасида ота-онасининг ҳақи жуда кўпdir. Ота-онага яхшилик қилишга буюрувчи ояtlар Куръони каримнинг бир неча сураларида келган. Афуски, баъзи бир ноқобил фарзандлар ота-оналарини кексайиб қолган вақтларида қаровсиз қолдиради, баъзилари эса уларни боқиш ва парвариш қилишдан ор этиб, қариялар уйига элтиб қўяди.

Учинчидан, Пайғамбаримиз соллаллоҳу алайҳи ва саллам: «*Ким ризқи мўл, умри узоқ бўлишини хоҳласа, силаи раҳм қилсин*», деганлар (*Муттафақун алайҳ*). Қариндошлар билан алоқани узиш оғир гуноҳ. Набий алайҳиссалом: «*Қариндошлик риштасини узган одам жаннатга кирмайди*», деганлар (*Муттафақун алайҳ*). Албатта, ҳар бир мусулмон жаннатга киришни умид қиласи. Демак, жаннатга киришни хоҳлаган инсон қариндошлар билан борди-келди қилиши,

қўлидан келганича уларга ёрдам бериши лозим.

Тўртинчидан, етимларга яхшилик қилиш. Етимлар жамиятдаги ожиз ва ҳимоясиз тоифадир. Расууллоҳ соллаллоҳу алайҳи ва саллам: “Мен ва етимни кафиллигига олган киши жаннатда мана шундай (яқин) турдимиз”, деб кўрсаткич ва ўрта бармоқлари орасини озроқ очиб кўрсатдилар (*Имом Бухорий ривояти*).

Бешинчидан, мискинларга яхшилик қилиш. Расули акрам алайҳиссалом: “**Мискин – инсонлар орасида (тиланчилик қилиб) юрадиган, бир-икки луқма ёки бир-иккита хурмо бериб, қайтариладиган кимса эмас. Балки мискин эҳтиёжини қопладиган нарсаси бўлмаган киши-дирки, одамлар унинг (бундай) аҳволидан воқиғ әмаслиги боис унга садақа бермайдилар, унинг ўзи ҳам туриб одамлардан тиланчилик қилмайди**”, деганлар (*Муттафақун алайҳ*). Демак, мискинни топиш, ҳақиқатан мискин эканини аниқлаш бироз мушкул. Ҳозир кўчак-кўйда, чорраҳаларда туриб, тиланчилик қилаётганлар ҳақиқий мискинлар эмас. Хайр-эҳсон қилмоқчи бўлганлар ҳақдор кимсаларни топиб берганлари яхши.

Олтинчидан, қариндош қўшнига яхшилик қилиш. Ҳадислардан бирида қариндош қўшнининг begona қўшнига нисбатан ҳақи икки ҳисса эканини, унинг ҳам қариндошлиқ, ҳам қўшнилик ҳақи борлигини таъкидлаганлар. Шунинг учун ояти каримада қариндош қўшни begona қўшнидан олдин зикр қилинмоқда.

Етминчидан, begona қўшнига яхшилик қилиш. Набий соллаллоҳу алайҳи ва саллам: “Жаброил алайҳиссалом менга қўшнига яхшилик қилишни шу даражасда кўп тайинладиларки, ҳатто мен унинг меросхўр бўлиши ҳақида ваҳий тушармикан деб ўйлааб қолдим”, деганлар (*Муттафақун алайҳ*).

Саккизинчидан, яқин ҳамроҳларга яхшилик қилиш. Муфассир уламолар “яқин ҳамроҳ” жумласини аҳли аёл, доимий

ҳамроҳ, ошна, оға-ини, меҳмон каби маъноларда тафсир қилишган. Барчасини умумлаштирган ҳолда айтиш мумкин, киши кундалик ҳаётида унга ҳамроҳ бўладиган инсонларга яхшилик қилиши лозим. Хоҳ у оиласда бўлсин, хоҳ кўчада, хоҳ ишда бўлсин, хоҳ ўқишида инсонлар билан яхши муомала қилиши, қўлидан келганича улардан яхшилигини аямаслиги даркор. Зеро, ҳар жойда инсонлар бир-бирларига ёрдам бериб, самими муюмалада бўлсалар, албаттта, жамиятда тинчлик, тотувлик ҳукм суради.

Тўққизинчидан, йўловчи-мусофирга яхшилик қилиш. Ўз ватанига қайтиш учун маблағи йўқ мусофирга ёрдам бериш лозим. Бирор юмуш билан begona юртга келган кимсага йўл кўрсатиб юбориш, оғирини енгил қилиш, яхши муюмалада билан унинг кўнглини кўтариш керак.

Ўнинчидан, қўл остингиздагиларга яхшилик қилиш. Қўл остидагиларга яхшилик қилиш деганда уларнинг меҳнатларини қадрлаш, қилган хизматлари учун вақтида ҳақ тўлаш тушунилади. Корхона раҳбарлари ходимларнинг лаёқатига қараб иш тақсимлаши, иқтидорлиларини рағбатлантириб туриши ҳам шулар жумласидандир.

Мазкур оятда жамиятдаги деярли барча тоифа инсонлар зикр қилиб ўтилган ва барчасига бирдек, яхшилик қилишга, яхши муюмалада бўлишга буюрилади.

«...Албатта, Аллоҳ қибрли ва мақтан-чоқ кишиларни севмайди». Бу оятда икки сифатнинг зикр қилинишига сабаб шуки, айнан улар, инсонни қариндошларига, яқинларига ва оятда санаб ўтилган бошқа тоифаларга яхшилик қилишдан тўсади. Оқибатда, инсон Аллоҳ таолонинг раҳматидан, мағфиратидан бенасиб, у севмайдиган бандалар тоифасига кириб қолади. Аллоҳ таоло барчамизни ёмон оқибатлардан асрасин.

Абдуқаҳҳор ЮНУСОВ,
Тошкент шаҳар бош имом-хатиби

*Ассалому алайкум ва
раҳматуллоҳи ва
баракотуҳ.*

СҮРАГАН

ЭДИНГИЗ...



САВОЛ: *Турли диндаги әркак ва аёлдан туғилган фарзандлар қайси динда бўлади?*

ЖАВОБ: Мусулмон аёл бошқа диндаги киши билан турмуш қуриши мумкин эмас. Мусулмон киши насроний ёки яхудий динида бўлган, ифратли, ибали аёлга уйланиши мумкин.

Бу ҳақда Қуръони каримда бундай деиилган: «Зинокорлик ва маҳфий ўйнаш қилиб олмаган ҳолда маҳрларини бериб, мўмина аёлларнинг ифратлиларига ва сизлардан олдин Китоб берилгандарнинг ифратли аёлларига (уйлансангиз ҳалолдир)...» (*Моуда сураси, 5-оят*).

Улар кўрган фарзанд Ислом динида бўлади.

САВОЛ: *Бугунда жуда кўплаб газета ва журналларда оятлар, ҳадиси шариф ёки Аллоҳнинг гўзал исмлари, шунингдек, ҳар хил ривоят ва ибратли ҳикоялар ёзилган. Албатта, бу ишлар ёшлиаримизнинг диний билимлари ошишига хизмат қиласи. Лекин айрим кимсалар бу саҳифаларни нопок жойларга ташлашиятти. Ўша қоғозларни ўқиб бўлгандан сўнг нима қилиш керак?*

ЖАВОБ: Ҳақиқатан, бугунги кунда кўплаб газета ва журналларда оятлар, ҳадиси шариф ва умуман динимизга доир мақолалар чоп этилиши олдингига нисбатан сезиларли даражада кўпайди. Бундай газета, журнал ва қоғозлар ўқиб бўлингач, уларни сақлаб кўйиш ёки одамлар босмайдиган ер-

га қўмиш лозим. Аммо зинҳор кўчага улоқтириш ёки у билан бирор нарсани ўраш ё ундан дастурхон ўрнида фойдаланиш мумкин эмас. Акс ҳолда, илоҳий калималарга нисбатан ҳурматсизлик қилинган бўлади.

САВОЛ: *Дуо қилишда қўлларни кўтариб, юзга суртиши ҳадисларда ворид бўлганми?*

ЖАВОБ: Ҳа, бу ҳақда кўплаб ҳадислар ривоят қилинган. Ҳазрат Умар розияллоҳу анҳу ривоят қиласи: “Расулуллоҳ соллаллоҳу алайҳи ва саллам дуога қўл кўтарсалар, уни юзларига суртмасдан туширмас эдилар” (*Имом Термизий ривояти*).

Анас розияллоҳу анҳу айтади: “Расулуллоҳ соллаллоҳу алайҳи ва саллам дуога қўл кўтарғанларида қўлтиқларининг оқлиги кўриниб турарди” (*Имом Байҳақий ривояти*). Саҳл ибн Саъд розияллоҳу анҳу ривоят қиласи: “Расулуллоҳ соллаллоҳу алайҳи ва саллам дуо қилсалар, қўл кўтарар, кейин юзларига суртар эдилар” (*Имом Байҳақий ривояти*).

Соиб ибн Язид розияллоҳу анҳу айтади: “Расулуллоҳ соллаллоҳу алайҳи ва саллам дуо қилсалар, қўл кўтарар, кейин юзларига суртар эдилар” (*Имом Байҳақий ривояти*).

САВОЛ: *Шайтон зурриётлари тўғрисида кўп эшишганман. Лекин улар нима қиласи, инсонни қандай йўлдан оздиради, шу каби саволлар мени қийнайди.*

ЖАВОБ: Ҳазрат Умар розияллоҳу анҳу айтади: “Шайтон зурриётлари тўқиз хилдир. 1. Залитун, 2. Васийн, 3. Лақус, 4. Аъвон, 5. Ҳаффоф, 6. Мурра, 7. Мусаввит, 8. Досим, 9. Валҳон.

Залитун бозордаги инсонларни йўлдан уради. Васийн мусибат чоғи васваса қиласи. Аъвон салтанат ишида султонга васваса қиласи. Ҳаффоф маст қилувчи ичимлик ичганида йўлига солади. Мурра сурнай чалганда шериклик қиласи. Лақус ўт-оловда шериклик қиласи. Мусаввит ёлғон хабарлар тарқатади. У тарқатган хабар оғиздан-оғизга кўчиб юради, аслида у хабарнинг асли йўқ. Досим эр-хотин ораларига низо солиб талоқ, жанжал, уруш каби ҳолларга ташвиқ қиласи. Валҳон таҳорат, намоз ва бошқа ибодатларда васваса қиласи”.

САВОЛ: Қабристонга борган айрим кишилар қабр атрофида айланиси, марҳумдан мадад сўрайдилар. Қабрларни зиёрат қилиши одоблари ҳақида маълумот берсангиз.

ЖАВОБ: Қабрларни зиёрат қилиш жоиз. Қабр зиёрати ўйин-кулги учун, одамларга қўшилиб бориб, кўриб келиш, томоша учун бўлмаслиги керак. Инсон қабрларда ётганлардан ибрат олиши керак.

Қабрлар зиёратига борганда таҳоратли бўлиш мустаҳабдир. Аслида мўмин-мусулмон ҳамма вақт таҳоратли юриши афзал.

Қабристонга кириб келганда умумий қилиб қабристонда ётган мусулмонларга салом берилади. Зиёрат қилмоқчи бўлган қабри олдига келганда, унинг қибла тарафига ўтиб, орқани қиблага, юзни эса қабр томонга қаратиб, қабр аҳлига салом берилади. Бу Пайғамбаримиз соллаллоҳу алайҳи ва салламдан қолган мўътабар одатдир. Жумладан, у зоти шариф қабристонга борганларида: “Ассалому алайкум, мўмин ва муслимлар диёри аҳли! Биз Аллоҳ хоҳласа, сизларга етишишамиз. Аллоҳдан ўзимизга ва сизларга оғият сўраймиз”, деганлар. Кейин Қуръондан билган сурә ёки ояларини ўқиб, қабристон аҳлига, ўзи зиёрат қилаётган қабрдаги кимса руҳониятига савобини бағишлайди.

Ўликлар ёрдам беришга қодир эмас. Улардан мадад ва ҳожатларни раво этишини сўраш ширкдир.

Зиёрат вақтида қабрларни ўпиш, уларни қучоқлаш, юзга суртиш каби амаллар макрухи таҳримий, яъни ҳаромга яқин макрух ҳисобланади. Қабр атрофини айланиш эса, мутлақо ҳаром. Қабрлар олдида чироқ ёки шамлар ёқиши, уларнинг ёнида қўйлар сўйиши, ҳар хил латталар боғлаш ҳам шаръян ҳаром.

САВОЛ: *Бармоқларни қирсиллатиши ёмон одатми?*

ЖАВОБ: Бармоқларни қирсиллатиши макрух, одобсизлик, ҳатто шайтонга тасбех айтиш ҳам дейилган.

САВОЛ: *Жума намозининг хутбасини бошқа киши, фарзини бошқа имом ўқиши жоизми?*

ЖАВОБ: Жуманинг хутбасини ўқиган киши жуманинг фарзини ҳам ўқиб бергани яхши. Чунки жума намози билан жума хутбаси гўё биттадир. Бордию хутбани ва фарзни бошқа-бошқа одам ўқиса ҳам жума намози дуруст бўлади. Лекин бундай қилмаган афзал (“Дурарул ҳуккам”).

САВОЛ: *Таҳорат қилаётганимда ювиладиган аъзолар ўрнини алмаштириб юбораман. Шунинг ҳукмими нима?*

ЖАВОБ: Ҳанафий мазҳабимизга кўра, таҳоратда ювиладиган аъзоларни Қуръони каримда келган тартибга кўра навбати билан ювиш суннат ҳисобланади. Бордию унугтган ҳолда тартиб бузилса, таҳорат дуруст бўлади, аммо суннат тарк этилган бўлади.

САВОЛ: *Овқатланаётганимизда, ошхона ходимларидан таом гўштининг ҳалоллигини сўраш керакми ёки овқатни “Бисмиллаҳ” деб еяверсак бўладими?*

ЖАВОБ: Гўшт ҳалол бўлиши учун жонивор сўйилаётганда “Бисмиллаҳ” айтилиши шарт. Овқат ейилаётганда “Бисмиллаҳ”ни айтиш кифоя эмас.

Ўзбекистон мусулмонлари идораси

Фатво маркази (78) 150-33-44.

Жонини берса беради,

«Атомиздан меҳрибон Тангримиз жалла ва таоло Қуръони каримда “Ла тулиқув биайдикум илат таҳлука”, яъни ўз қўлларингиз ила ўзингизни таҳликага отмангиз, дер. Биз бўлса, бадбахтона ва Худонинг амирига бўюн қўймасдан ... тўй ва азо деган, йўқ бўлушилизға сабаб бўлган одатларга бору йўқимизни сарф ва исроф этармиз» (Маҳмудхўжа Беҳбудий).

Асрлар оша тўй-маъракаларни тартибга солиш бўйича кўп чоралар кўрилсада, аммо уни бир меъёрга келтириш учун юз йиллар ҳам камдек, назаримизда.

Илк бор Амир Олимхон тўйларда паловдан бошқа овқат тарқатганларга 75 дарра, кўпкари, улоқ чопиш тадбирларини ташкил қилганга ўлим жазосини жорий этган. Бундан ташқари, Бухоро муфтийси домла Икром билан кўплаб бидъат-хурофот амалларни бекор қилинган. Лекин уни ҳаётга тўлиқ татбиқ этиш ишлари охирига етмай қолган.

Афсуски, инсоният турмуш тарзи, илм-фан қанчалик ривожланмасин, дунёқарашимиз ўша-ўша – бир аср ортда қолаётгандек. Чунки тўй-маъракалардаги исрофгарчиликлар бир дам тўхтаганийи йўқ. Буни кўриб Асқад Мухторнинг: “Бу халқ жон берса берадики, жаҳолатни бермайди” (“Бухоронинг жин кўчалари” асари), деган сўзлари ҳақ эканини англайсан киши.

Яқинда Самарқанд вилоятида ўртаҳол бир кишининг тўйига бордик. Дастурхон тўкин-сочин: ноз-неъматлар билан тўла. Қай бирини ейишни билмайсан. Яхна, товуғу балиқлар, турли салатлар, ширинлигу тортлар, чақ-чуқлар, шоколаду мевалар. Ичимликлар ҳам ўзига хос. Бу дастурхонни кўрган одам тўй қилаётган киши бой-бадавлат бўлса керак, деб ўйлаши тайин. Лекин унинг тўйдан кейинги аҳволи ҳавас қиласи эмасди...

Кейинги пайтда тўю зиёфатларда дастурхонга қўйиладиган ноз-неъматлар

сони тобора ортиб боряпти. Биргина гўшт маҳсулотларининг ўзи бир қанча: яхна, тандир, товуқ, дудланган гўштларни санаб адогига етиб бўлмайди. Буларсиз гўё зиёфат ўтмайди.

Хўш, тўй дастурхонига қўйилган бу ноз-неъматларнинг қанчаси ейилади?

Маълумотларга кўра, воҳа тўйларида асосан гўшт маҳсулотлари 70–80 фоиз, мевалар 40–50, ширинликлар 10–20, чақ-чуқлар 10–20, салатлар 60–70, ичимликлар 70–80, нон 30–50 фоиз ейилади. Тўйда бериладиган биринчи овқат 70–80 фоиз ейилса, иккинчи овқат эса 40–60 фоиз тановул қилинади. Агар тўй қилаётган киши бадавлатроқ бўлса, таомлар тури яна кўпаяди.

Эътибор қаратсак, дастурхонга қўйилган неъматларнинг ярми ейиш учун, қолгани кўрк учун экан. Қанча егуликлар ташлаб юборилаётгани ҳеч кимни қизиқтирумайди. Нима бўлса ҳам меҳмонларнинг кўнглини олиш: пул кетса кетсин, обрў кетмасин, қабилида.

Дастурхонга қўйилган шунча ноз-неъматларни бир ўтиришда еб бўлмайди. Яримта нон, бир коса овқат билан қорнимиз тўяди. Нафсимиз қонганича еймиз-у, аммо соғлиғимизни ўйламаймиз. Бунинг турган битгани чўнтакка ҳам, соғлиққа ҳам зарар-ку!

Бу тўйлардаги биргина дастурхон безатищдаги ортиқча ҳолатлар. Бундан ташқари, яна қанча кераксиз урфларимиз бор. Кийим-кечақдан тортиб, уй безаш, машиналарнинг турна қатор бўлиб юриши...

Абу Толиб Али розияллоҳу анҳу Пайғамбаримиз соллаллоҳу алайҳи ва салламнинг севикли қизлари Фотима онамизга ўйланаётганида тўй дастурхонида бир қўй гўшти ва бир неча соъ жўхори бўлган. Бу неъматлар ҳам саҳобалар томонидан ёрдам сифатида олиб келинган.

Бугун тўйларимизга битта қўй тутул, битта буқа ҳам етмаяпти. Ҳатто бирор нозик меҳмон келса, унинг шарофатига қўй сўйилиб, яна бир қўйнинг пулига бозорлик қилинади. Ейилмаса ҳам, дастурхон тўкин бўлиши керак.

Имконимиз етмаса-да, қарз олиб, ўзимиз оч қолсак-да, элга катта зиёфат берамиз. Бу

лекин...

на ақлга ва на мантиққа түғри келади. Минг афсус, бугун түй қиласман деб боши берк күчага кириб қолаёттанлар кам эмас. Қанчалаб йигитларимиз пул топиш, түй-хашам қилиш илинжида чет әлларни кезиб юрибди. Қиз чиқараман деб уйини сотиб, күчада қолганлар ҳам бор. Буларнинг барчаси дабдабозликтан бошқа нарса эмас.

Аллоҳ таоло Қуръони каримда: “Аллоҳ йўлида (бойликларингиздан) сарфлангиз ва ўз қўлларингиз (бахиллигингиз) билан ўзларингизни ҳалокатга ташламангиз! (Барча ишларни) чиройли қилингиз. Албатта, Аллоҳ чиройли (иш) қилувчиларни яхши кўради” дея марҳамат қиласди (*Бақара сураси, 195-оят*). Бу билан Раббимиз ҳар бир ишни ўйлаб, мулоҳаза қилиб, гўзал тарзда бажаришга, ўзини қийнаб ҳалокатга ташламасликка, балки бирор ишни чиройли адо этиб, Аллоҳга севикли бўлишга буюради.

Яна бир ояти каримада: “...Исрофгарчиликка мутлақо йўл қўйманг! Чунки исрофгарлар шайтонларнинг биродарлариидир. Шайтон эса Парвардигорига нисбатан ўта ношукур эди”, деб марҳамат қилинади (*ИсроСураси, 26–27-оятлар*). Бу оятда Парвардигоримиз исрофга йўл қўймасликка қаттиқ амр этиб, ҳатто исроф қилгувчини шайтон биродарига тенглаштирмоқда. Ношукрлар қаторида бўлиб қолишимиздан огоҳлантирмоқда.

Сўзимиз сўнгиди Махмудхўжа Беҳбудий бобомизнинг қуйидаги сўзларини эслайлик: “Тўй ва таъзияға сарф қилинатургон оқчаларимизни биз, туронийлар, илм ва дин йўлиға сарф этсак, анқариб оврупойилардек тараққий этармиз ва ўзимиз-да, динимиз-да обрўй ва ривож топар. Йўқ, ҳозирги ҳолимизға давом этсақ, дин ва дунёда зиллат ва мискинатдан бошқа насибамиз бўлмайдур”.

Бобур МУҲАММАД



Ҳимматли инсон

Ҳаётда шундай инсонлар борки, уларнинг ҳаёт йўли на- муна ва тақсинга лойик.

Наманган тумани Хонобод қишлоғида истиқомат қилувчи шифокор Акмалхон ҳожи Тожибоев ҳам ана шундай инсонлардан. У киши доим эл-юрт ғам-ташвишида кишиларга яхшилик улашиш пайида бўлади.

Иш фаолияти давомида қанча nochор беморларга ҳиммат кўрсатган. Мана, ўн йилдирки, Рамазон ойида кексалар, етим, эҳтиёжмандларга ифторлик ва сахарликлар, моддий ёрдам тарқатади. Ўтган йили масжид таъмирида ҳам катта ёрдам қилди.

Маърифат улашиш мақсадида маҳалла аҳлига 500 дан зиёд китоб совға қилди. Бундан ташқари, “Ҳидоят”, “Мўминалар” журналлари ҳамда “Ислом нури” газетасига обуна ҳам қилдириб берди. У бундай хайрли ташаббусни яна давом этириб, қишлоқ аҳлини, айниқса, ёшларни илмли қилиш харакатида.

Аллоҳ у кишининг ҳар бир яхши амали учун ажр-мукофотини зиёда қилиб берсин.

Саховатли инсонлар кўпаяверсин.

Тўхтахон РАҲИМОВА,
Наманган тумани

“Қуръон илмлари” араб тилидаги علوم القرآن (улум ал-Қуръон) бирикмаси-нинг ўзбек тилидаги تارжимаси ҳисобланади. Соҳа уламолари علوم (улум) ва فرآن (Қуръон) сўзларига алоҳида таърифлар беришади.



Муқаддас китобга доир илмлар

Мұхаммад Абу Шаҳба “Ал-Мадхал ли диросат ал-Қуръон” асарида илмга шундай таъриф беради: “Улум” “ilm”нинг күплигидир. Илм араб тилида “фаҳм” ва “маърифат” маъносидаги масдар (харакат номи)дир.

Хукамолар “ilm” сўзига бундай таъриф беришган: “Илм бирор нарсанинг ақлда ҳосил бўлган сурати ёки суратнинг ақлда пайдо бўлишидир”. Бошқа олимлар: “Илм бир нарсани воқеликда қандай бўлса, шундай идрок этишдир”, деб таъкидлашган.

Олимлар “ilm” сўзига турлича таърифлар бергани каби, “Қуръон” сўзи, унинг келиб чиқиши, ундан кўзланган маъно тўғрисида ҳам бир қанча фикрларни илгари суришган. Улардан тўғрироғи, кўпчилик уламолар ихтиёр қилгани қуйидагича: «**فَإِنْ قُلْتُمْ تِلْوَاتِ الْقِرْآنِ**» сўзи “тиловат қилди” маъносидаги قرآن нинг масдари бўлиб, “ўқимоқ, тиловат қилмоқ” деганидир. Сўнгра бу маънодан нақл қилиниб, Расулуллоҳ соллаллоҳу алайҳи ва салламга нозил бўлган муборак китобга ном қилиб қўйилган». Бу таъриф Имом Лихёнийга тегишли бўлиб, Имом Зарқоний, Доктор Абу Шаҳба, Шайх Мұхаммад Содик Мұхаммад Юсуф, Манно ал-Қаттон ва бошқа кўплаб уламолар ушбу фикрни қўллаб-куватлашган. Улар “Қуръон” сўзи “ўқиш”, “тиловат қилиш”, “қироат қилиш” маъносида эканига ушбу оятларни далил қилишади:

“Албатта, уни жамлаш ва ўқиб бериш Бизнинг зиммамиздадир. Бас, Биз уни ўқисак, қироатига зеҳн солиб тур” (Қиёмат сураси, 17–18-оятлар).

“Қуръон” сўзи истилоҳда бундай тарифланади: “Қуръон Аллоҳ таолонинг Набийси Мұхаммад соллаллоҳу алайҳи ва салламга нозил қилган, лафзлари ожиз қолдирувчи, тиловати ибодат бўладиган, мутавотир тарзда нақл қилинган, мусҳафларда кўчирилган, Фотиха сураси билан бошланиб, Нас сураси билан туговчи каломидир”.

Аллоҳ таоло Ўз каломида бундай марҳамат қиласиди:

“Ва агар бандамизга туширилган нарсамизга шакингиз бўлса, унга ўхаш бир сурат келтиринг ва рост сўзловчилардан бўлсангиз, Аллоҳдан ўзга гувоҳларингизни чақиринг. Бас, агар қила олмасанглар, ҳеч қачон қила олмайсизлар ҳам, ёқилғиси одамлар ва тош бўлган, кофиirlар учун тайёрланган ўтдан кўркинглар” (Бақара сураси, 23–24-оятлар).

Мұхаммад Али ас-Собуний “Улум ал-Қуръон” (Қуръон илмлари)га бундай таъриф беради: “Улум ал-Қуръондан қасд қилинган нарса ушбу буюк, ўзгармас китобга алоқадор бўлган баҳслардир. Улар унинг нозил бўлиши, жамланиши, тартибланиши, китобга ёзилиши, нозил бўлиш сабаблари, ундаги маккий ва маданий (оят)лар, мұхқам ва муташобех, носих ва мансухларни билиш ва бошқа Қуръони азимга боғлиқ бўлган кўпгина масалалардир”.

“Улум ал-Қуръон”, яъни “Қуръон илмлари” бирикмаси ўз маъносидан алоҳида фан сифатида шаклланган ва ўзида Қуръони каримга доир баҳсларни жамлаган мустақил илмга атоқли ном ўлароқ қабул қилинди. Бугунги кунда ҳам у айнан шу ном билан номланади.

Юқоридаги таърифлардан келиб чиқиб айта оламизки, Қуръон илмлари соҳасида айнан Қуръони каримга оид бўлган баҳслар, яъни унинг нозил бўлиши, сурат оятларнинг тартибланиши, қандай қилиб жамлангани, мусҳафга жамланиш тарихи, бир неча қироатларда ўқилиши, тафсир қилиш услублари, муфассирларга қўйилган шартлар, эъжоз ал-Қуръон илми, ғариб ал-Қуръон илми, сабаби нузул илми, маккий ва маданий суралар, носих ва мансух, мутлақ ва мұқайяд, мұхқам, муташобех ва бошқалар ҳақида сўз боради.

Адҳамбек ЯНГИБОЕВ,
Ўзбекистон Халқаро ислом академияси
докторант

Навоийнинг икки тарихий асари

**Туркий тилда биринчи бўлиб
Пайғамбарлар тарихи ҳақида асар
ёзган олим, буюк бобомиз Мир
Алишер Навоий ҳазратлариридир.
У зот бу асарини «Тарихи анбиё
ва ҳукамо» деб номлаган. Бундан
олдин пайғамбарлар тарихига
оид асарлар араб ва форс
тилларида кўплаб ёзилар эди.**

Ана шундай тарихга оид асарларидан яна бири «Тарихи мулуки ажам» ҳисобланади. Баъзи олимлар «Алишер Навоийнинг “Зубдатут таворих” номли тарихга оид асари ҳам бўлган», дейдилар. Туркиялик олим Айшахон Дениз Абик ёзади: «Алишер Навоий ўзининг асарларида икки марта “Зубдатут таворих” сўзини ишлатган. Демак, Алишер Навоийнинг “Зубдатут таворих” номли асари ҳам бўлган-у, аммо бизгача етиб келмаган».

Бошқа олимлар эса, «Алишер Навоий “Тарихи анбиё ва ҳукамо” асари билан «Тарихи мулуки ажам» асарини қўшиб, “Зубдатут таворих” (Тарихларнинг қаймоғи) деб номлаган», дейди. Дарҳақиқат, Алишер Навоийнинг бу асарларини ўрганган киши «Тарихи мулуки ажам» китоби «Тарихи анбиё ва ҳукамо» асарининг давоми деган хulosага келиши мумкин. Чунки Алишер Навоий ҳазратлари «Тарихи анбиё ва ҳукамо» китобининг охирги жумласида: “Анбиё алайҳиссаломлар ва ҳукамолар тарихи тўлалигича зикр этилди. Энди ажам подшоҳларининг тарихини битишга киришаман”, деб ёзган. Аслида эса бу жумла, «Тарихи анбиё ва ҳукамо» асари билан «Тарихи мулуки ажам» асари иккита алоҳида тарих эканини кўрсатади. Чунки бу иккиси битта асар бўлганида Алишер Навоий ҳазратлари битта

асарнинг ўртасида бу жумлани келтириб ўтирасдан, ажам подшоҳларининг тарихини ёзишда давом этган бўлар эди. Навоийнинг буни алоҳида зикр қилиши, бу тарихлар бир-биридан айри-айри бўлган иккита асар эканлигини кўрсатади. Алишер Навоий ҳазратлари бу икки тарихни бирластириб «Зубдатут таворих» (Тарихлар қаймоғи) деб номлаган. Агар бу битта асар бўлганида, «тарих» сўзининг кўплиги «таворих» сўзини ишлатмаган бўлар эди.

Алишер Навоий пайғамбарлар тарихи, ажам (форс) подшоҳлар тарихидан сўнг, турк подшоҳларининг тарихини ёзиб, замондоши ва дўсти Ҳусайн Бойқарони ҳам киритмоқчи бўлган.

Энди Навоийнинг «Тарихи анбиё ва ҳукамо» асарига келадиган бўлсак, бу асар бошқа «Пайғамбарлар тарихи»га оид китоблардан ўзига хос жиҳати билан фарқ қиласди. Биринчидан, бу тарих китобида Алишер Навоий пайғамбарларнинг тарихларини қисқа баён қилгач, ўтмишдаги энг билимдон ҳаким зотлар ҳақида маълумот беришга ўтган. Иккинчи жиҳати, Навоий ҳазрат асарда Пайғамбарлар ҳақида маълумот берар экан, Луқмони Ҳаким ҳақида, у зотнинг пайғамбар эмаслиги тўғрисида бироз сўз юритиб ўтган.

Асарда баъзи набийларнинг тарихи қисқа келтирилган бўлса, баъзилариники узун ва батафсил келтирилган. Бир сўз билан айтганда, Алишер Навоийнинг «Тарихи анбиё ва ҳукамо» асари Навоий ҳазратнинг такрорланмас даражадаги мумтоз олим эканлигини яна бир карра билдирадиган асар ҳисобланади.

**Абдурасул ТОШПЎЛАТОВ,
Алишер Навоий номидаги
Давлат адабиёт музейи таянч
докторанти**



Ҳаракатланувчи гумбазлар

Масжидул Ҳаромни кенгайтириш жараёнида замонавий дизайн ва техник имкониятлар инобатга олинди.

Лойиҳа доирасида 22 та гумбаз қурилиши белгиланган бўлиб, улардан 12 таси ҳаракатланувчи ва 10 таси қўзғалмас шиша гумбазлардан иборат. Асосий йўлакдаги ҳаракатланувчи гумбазнинг ички баландлиги 25 метр, ташқи диаметри 36 метр, оғирлиги 800 тоннани ташкил этади.

Бу гумбазлар марказий бошқарув блоки орқали очилиб, бино ичida ҳаво айланишини таъминлайди. Орқа ва ўрта ҳовлилар устида жойлашган 12 та ҳаракатланувчи шиша гумбазнинг оғирлиги таҳминан 300 тонна, ўлчамлари 28,5x17 метр, ташқи баландлиги 8,75 метрdir.

20 кунда 22 миллион зиёратчи

Муборак Рамазон ойининг дастлабки 20 кунида Маккадаги Масжидул Ҳаромга 22 миллиондан ортиқ зиёратчилар ташриф буюрди.

Икки Муқаддас Ҳарам Бош бошқармаси бошлиғи Шайх Абдураҳмон ас-Судайснинг таъқидлашича, бундай кенг кўламли зиёратчилар оқимини кутиб олиш ва кузатиш учун мутахассислар олдиндан юқори тайёргарлик кўрган.

Тезкор режа доирасида 4000 нафар ишчи Масжидул Ҳаромни кунига 10 марта тозалади. Яна 70 нафар ишчи масжид ҳудудини кечаю кундуз антисептик моддалар билан дезинфекция қилди. Масжид атрофи ва унинг радиусида 8000 га яқин транспорт воситаси, жумладан, 3000 та электр транспорт воситаси ҳаракатланди, 90 нафар мухандис-техник 200 та эскалатор ва 14 та лифт ҳолатини назорат қилиб турди.



Зиёратчиларга 50 тилда хизмат

Саудия Арабистони Икки Муқаддас Ҳарам бошқармаси Хорижий тиллар ва таржима бўлими зиёратчилар учун Масжидул Ҳаромнинг тарихи ва бугуни ҳақидаги маълумотларни 50 тилда танишириш хизматини тақдим этди.

Унга кўра, лойиҳа доирасида зиёратчилар 50 тилда Масжидул Ҳаромнинг муҳим жойлари ва тарихий обидалари билан яқиндан танишади. Ушбу зиёрат Каъбадан бошланиб, Масжидул Ҳаромнинг барча муҳим жойларига ташриф буюришни ўз ичига олади.



2 миллиарддан кўп

Global Muslim population веб-сайтига кўра, дунёда мусулмонлар сони 2 006 931 770 кишига етди.

Бу дунё аҳолисининг 25 фоизи дегани.

Миннеаполисда 5 маҳал аzon



АҚШнинг Миннеаполис шаҳри масжидларида беш маҳал намоз пайти овоз кучайтиргичлар орқали аzon айтишга рұхсат берилди.

Миннеаполис шаҳар кенгаяши шаҳардаги масжидларга эрталаб соат 3:30 дан 23:00 гача аzon айтишга рұхсат беришди. Илгари шаҳарда кунига 3 марта аzon айтилар эди.

Италияда тез тарқалаётган дин

Бугун Италияда диний жиҳатдан католик христианлик ҳукмрон бўлсада, Ислом дини Европа нинг бошқа қисмларига қараганда анча тез тарқалмоқда.

Хозирда бу ерда 60 дан ортиқ масжид ва 100 дан ошиқ намозхоналар мавжуд.

Италия пойтахтидаги “Рим” масжиди Farb дунёсидаги энг катта масжид бўлиб, унинг майдони 30000 квадрат метр ва у 12000 дан ортиқ намозхонни сиёдирига олади. Бу бинода Италия Ислом маданияти марказининг бош қароргохи ҳам жойлашган.



Энг кам чекувчилар

Россиянинг энг кам тамаки чекиладиган ҳудудлари Ислом дини устунлик қиласидиган Чеченистон, Ингушетия ва Доғистон Республикаларидир.

Статистик маълумотларга кўра, Чеченистон аҳолисининг атиги 3,3 фоизи, Ингушетияда 4 фоиз, Доғистонда эса, 6 фоиз киши чекади. Энг ёмон вазият Олтой, Сахалин, Магадан, Ненец автоном округи ва Комида. Ушбу ҳудудларда ўртacha ҳар учинчи аҳоли кашанда. Умуман олганда, Россияда 15 ёшдан ошган фуқароларнинг қарийб 20 фоизи, яъни 23 миллионга яқин киши ушбу кашандаликка мойил.



Хабар

Кубо масжида кенгаяди

Саудия Арабистони оммавий ахборот воситалари Масжидун Набавий ва Қубо масжидини ривожлантириш лойихаси тафсилотларини эълон қилди.

“Нигоҳ-2030” лойихасига мувофик, Пайғамбаримиз масжидида икки миллион намозхонни сиёдириш режаси илгари суримоқда. Ушбу лойиха доирасида Қубо масжиди ва унинг атрофидаги ҳудудларда ҳам бунёдкорлик ишлари олиб борилади.

Лойихада Қубо масжиди (Ислом тарихида қурилган биринчи масжид) ва унинг атрофидаги майдони 50 000 квадрат метрга, яъни ҳозирги майдонидан 10 баравар кўп, сифими эса 66 000 намозхонга етказилади.

Саховатли мусулмонлар

Лондонда жойлашган “Ayaan Institute” тадқиқот ташкилоти Британияда истиқомат қилувчи мусулмонлар хайрия ишларида бошқалардан кўра энг саховатли одамлар эканини эълон қилди.

Маълумотларга кўра, британиялик мусулмонлар Йилига 1 миллиард фунт стерлинг хайрия қиласидар.

2050 йилга бориб Британия мусулмонлар жамияти хайриялари Йилига 4 миллиард фунт стерлингга этиши мумкин.

**Интернет маълумотлари
асосида тайёрланди.**

Етти муборак таълим

Ҳақ таолонинг дўсти Увайс Қараний ҳазратлари Аллоҳ азза ва жалла розилигига эришишнинг 7 услубини қуидагича баён қилади.

1. Юксаклик қидирдим, тавозеда топдим.

Ояти каримада марҳамат қилинади: “Раҳмоннинг (суюкли) бандалари ерда камтарона юрадиган... кишилардир” (*Фурқон сураси, 63-оят*).

Идрис алайҳиссалом насиҳатларидан бирида: “Ақлли кишининг мартабаси юксалса, тавозеси ҳам ортади”, дейилади.

Уруг ерга қадалмагунича ниш уриб ўсмайди. Шунингдек, инсон ҳам камтар бўлмагунича юксала олмайди. Аллоҳнинг раҳмати кибрлиларни эмас, камтарларни юксалтиради.

Жалолиддин Румийнинг қуидаги сўзлари ҳам манмансираганларнинг қазо қиличи ўз заарларига ишлашини очиқ шаклда ифодалайди: “Қилич бўйни бўлганнинг бўйнига урилади. Соя эса ерга қапишиб ётади, унинг на бўйи ва на бўйни бўлмагани учун яраланмайди, кесилмайди”.

Гурур, кибр ва ужб аксарият ҳолларда истеъоддли ва мол-мулк соҳиби бўлган инсонларда юзага келади. Ваҳоланки, инсонга ато этилган неъматларнинг барчаси икки учли кескир пичноқ кабидир. У яхшилик учун ҳам, ёмонлик учун ҳам хизмат қилиши мумкин.

Шундай экан, инсон огоҳ бўлиб, моддий ва маънавий бойликларни яхшилик йўлида сарфлаши лозим.

Мўмин банда доимо: “Ўзимга қанча мол-мулк сарфлаяпман, Аллоҳ ризосини қозониш учун бошқаларга қанча эҳсон қиляпман?” деган савонни ўзига бериб туради.

2. Шухрат қидирдим, ҳақириликда топдим.

Пайғамбаримиз соллаллоҳу алайҳи ва саллам: “Ё Раб, Сени Сенга муносиб тарзда таний олмадим. Сенинг шаъннингга лойиқ қуллик қила олмадим” дея ҳақири ҳолда Аллоҳ таолога илтижо қилар, истиғфор айтардилар. Яратган Эгамга энг севикли банда, оламларнинг яратилишига

сабабчи инсон бўлганлари ҳолда Расулуллоҳ алайҳиссаломнинг бу ҳақири ҳоллари бизга юксак намуна бўлиши шарт. Жаноби Ҳаққа лойиқ ҳолда бандалик қилиш Унинг улуғлигини англаш, бизларга ато этган хисобсиз неъматлари ҳақида тафаккур қилиш, шу аснода ибодатларимиз ва шукримизни ҳеч қачон бу неъматларга етарли “тўлов” ўрнида кўрмаслик керак.

Дуоларимиз каби ибодатларимизнинг ҳам қабул бўлишини доимо Аллоҳдан сўрашимиз лозим.

3. Шон-шараф қидирдим, тақвода топдим.

Ояти каримада марҳамат қилинади: “... Аллоҳдан қўрқингиз! Аллоҳ сизларга (шундай) таълим беради. Аллоҳ ҳамма нарсани билувчи Зотдир” (*Бақара сураси, 282-оят*).

“...Албатта, Аллоҳ наздида (энг азизу) мукаррамроғингиз тақводорроғингиздир. Албатта, Аллоҳ билувчи ва хабардор Зотдир” (*Хужсурот сураси, 13-оят*).

Шубҳасиз, башарият орасида энг юксак шарафли наасаб Расулуллоҳ соллаллоҳу алайҳи ва салламники, у зотнинг аҳли байтлариники ва авлодлариники. Фақат тақво шундай бир шарафки, соҳибини Аллоҳ азза ва жалла хузурида юксалтиради. Маънан аҳли байтнинг бир аъзосига айлантиради.

Пайғамбаримиз алайҳиссалом: “Салмон биздандир, аҳли байтдандир”, деганлар (*Ином Ибн Хишом ривояти*).

Демак, зоҳирда аҳли байтга тааллуқли бўлишдан ташқари, маънан унга оид бўлиш бор. Бу эса мўмин қалблар учун энг олий мартабадир. Бу фазилатга эришишнинг ягона шарти эса “тақво”дир. Яъни инсоннинг асл қадр-қиммати дунёдаги молу мулк, шон-шухрат, наасаб ва мансаби билан эмас, Аллоҳ таолога бўлган тақвоси билан ўлчанади.

Тақво эса Аллоҳга чин маънода бандалик қилиш, Расули акрам алайҳиссаломнинг хулқлари билан хулқланиш демакдир.

(Давоми кейинги сонда.)

Нигора МИРЗАЕВА
тайёрлади.

Шайх Муҳаммад Содик Муҳаммад Юсуф асарларида тасаввуф тарғиботи

Мустақилликка эришгач, халқимизнинг Ислом динини ўрганишга бўлган эҳтиёжи ортиб борди. Илк йилларда диний манбаларни таржима қилиш, изоҳ ва шарҳлар ёзиш ҳамда нашр этиш, мураккаб жараённи талаб қилди.

Сабаби, бир асрдан ортиқ давом этган мустамлака миллатимизни ўз дини ва уламоларидан узоқлаштирган ҳамда коммунистик мафкура руҳиятини халқимиз онгига чуқур сингдирган эди. Шундай мураккаб даврда Шайх Муҳаммад Содик Муҳаммад Юсуф ҳазратлари масъулиятни ўз зиммасига олди.

Шайх Муҳаммад Содик Муҳаммад Юсуф раҳматуллоҳи алайҳ диний-маърифий фаолияти давомида динимизга оид кўплаб асарлар ёзган. Бугун у асарларни халқимиз катта қизиқиши билан ўрганмоқда. Ҳазрат бу асарларида Ислом шариати кўрсатмалари, меъёрлари, одоб-ахлоқини ўқувчиларга ишончли ва содда ифодалар билан етказишга катта аҳамият берди. Дастребки даврда халққа Ислом шариатига доир зарурий, бирламчи китоблар, рисолалар, мақолалар, маъруза ва интервьюлар етказилган бўлса, босқичмабосқич халқимиз диний эҳтиёжлари ва билим савияси ортиб боришини эътиборга олган ҳолда тасаввуф таълимотига оид асарлар ва туркум маъruzalarни ҳам тақдим этди.

Шайхнинг “Тасаввуф ҳақида тасаввур” китобида тасаввүфнинг назарий масалалари билан бирга, дунё ва юртимиз тасаввуф аҳли ўртасидаги боғлиқликлар, янгиликлар, турли ихтилофлар ва мунозаралар бўйича таҳлиллар тақдим этилган. “Ҳадис ва ҳаёт” силсиласининг учинчи жузи – “Ният, ихлос ва илм китоби”, ўттиз тўртинчи жузи – “Яхшилик ва ахлоқ китоби”, ўттиз бешинчи жузи – “Зикр, дуолар, истиғфор ва тавба китоби”, ўттиз олтинчи жузи – “Зуҳд ва рақоиқлар китоби”, ўттиз еттинчи жузи – “Адаб китоби” айнан руҳ тарбиясига оидdir.

Олимнинг “Руҳий тарбия” китоби 2014 йилда нашр этилган. Уни ёзишда 86 та мўътабар манбадан фойдаланилган.

Шозилия тариқати шайхи, мисрлик аллома Ибн Атоуллоҳ Сакандарий (1260–1309)нинг “Ҳикамул Атоийя” китоби тасаввұф ихлосмандлари орасида машҳур. Шайх Муҳаммад Содик раҳматуллоҳи алайҳ ҳам мазкур манбага “Хислатли ҳикматлар шарҳи” номли 5 жуздан иборат шарҳ ёзган.

Илмнинг баракотини қарангки, у зотнинг вафотларидан сўнг ҳам баъзи нашр этилмаган китоблари оила аъзолари ва шогирдлари томонидан халқимизга тақдим этиб келинмоқда. Жумладан, мавзуга доир “Нақшбандия: вазифалар, зикрлар” китоби 2018 йилда нашр этилди.

Ҳазрат замонавий технологиядан самарали фойдаланган. Интернет тармоги орқали Ислом маърифатини тарқатиш, халқимизни мусулмон оламидаги янгиликлардан хабардор қилиш, турли бузғунчи оқимлар хатаридан огоҳлантириш, уларнинг шубҳа ва иddaolariiga raddия bериш, мусулмон оммасида юзага келаётган турли мавзулардаги шаръий саволларга жавоб бериш каби хайрли мақсадларни кўзлаб, www.islom.uz веб-саҳифасига асос солди. Ушбу веб-саҳифа тез орада йирик ижтимоий минбарга айланди. Ҳазратнинг биргина “Руҳий тарбия” ва “Тасаввуф ҳақида тасаввур” китоблари асосида 211 та дарс islom.uz веб-саҳифасида ўқувчиларга тақдим этилди.

Шайх Муҳаммад Содик Муҳаммад Юсуф раҳматуллоҳи алайҳининг тасаввуф таълимотининг асл ҳақиқатларини халқимизга етказиш ва мусулмонларни гўзал ирфоний ахлоқлар билан тарбиялаш борасидаги хизматлари алоҳида ўрин тутади. Бугунги кунда инсоний қадриятларни сақлаб қолиш ва соғлом эътиқодли авлодни тарбиялаш учун бу асарлардан фойдаланиш энг самарали йўлдир.

Тоҳир ҲОТАМОВ,
ЎзҲИА Ислом тарихи ва манбашунослиги
IRCICA кафедраси доценти

Йўл олдим ўзимдан Сени ахтариб...

* * *

Остона ҳатласанг,
Ҳар томонинг йўл,
Макбулига манғиб кетаверасан.
Балки боғ чиқади, балки тоғ ё чўл,
Шаҳар, қишлоқ, қалъа... Ўтаверасан.

Йўл,
Ортингдан унсиз термулиб қолар,
Кулгиси юзингдир, йиғлари – сўзинг.
Пешонанг тор эса, қалби порадир,
Бахтинг бутун бўлса, чароғон ва кенг.

Умр узоқ дейсан, кетаверасан,
Бир манзилга етсанг, манзил бўлмайди.
Бир манзилга бориб... биласанки сен,
Йўллар тугамайди, йўллар ўлмайди!..

* * *

Ё Тангрим,
Бир қўшиқ бер,
Бўлсин Ўзинг сари йўл.
Ашъорий бу сатрлар
Айтган қулдан рози бўл.

Ўзингдан айро сўзни
Солма, ё Раб, дилимга.
Ризога элтар йўлни
Нишаб айла тилимга.

Ўтаётган ҳар куним
Жума қил – Одина қил.
Кўнглимнинг ҳар буржини
Макка қил, Мадина қил...

* * *

Ахийлар оҳига ошно қил, Эгам!
Аҳдимни фақр-ла рўшно қил, Эгам!
Йўл олдим ўзимдан Сени ахтариб,
Собир қил, сабрни ош-нон қил, Эгам!

* * *

Ўтрик хаёлларим ўтди, ким билди?
Кимлар яқосидан тутди, ким билди?
Келарнинг ҳукмига эҳтисоб-ку* йўқ,
Кетарга не битик битди, ким билди?!

*Назорат

Абдунаби БОЙҚЎЗИ

Отажон

Отажон,
Мендан, рости...
Нима авзум топдингиз?
Ҳар қадамда адашдим...
Яширдингиз, ёпдингиз.

Гоҳида ҳаддан ошсам,
Аразлаб ҳам қолдингиз.
Сал ўтмай, яна борсам,
Яйраб кутиб олдингиз.

“Бу ёққа чиқ, ёнимга”,
Дердингиз ёлвир боқиб.
Мехрингиз дарёсида
Кетардим сувдай оқиб.

Син солиб ранг-рўйимга,
Чамалаб бир ширин сўз.
“Буям чўкиб қопти”, деб
Чўкар эди, кўнглингиз.

Ҳай,
Майли-да,
Чўксак ҳам,
Тирикмиз-ку, ҳар қалай!
Олисларда юрсак ҳам,
Юрибмиз-ку, ҳар қалай!

Сиз борсиз,
Шу уй – макон
Жаннатнинг бир гўшаси.
Сиз борсиз – бор Андижон,
Тошкан... жигаргўшаси.

Шукр, токи сиз борсиз,
Қариликка йўл бўлсин.
Умрингиз, иймонингиз,
Узун ва комил бўлсин!

Отам бор деб биз довон
Ошиб, юриб ҳорийлик.
Сизда эса яшариб
Бораверсин, қарилик!..

2017

Тошкент шаҳри

Каъба тавофидаň ёришди қалбим...

Иноятларидан қўнгилни чоғланг

Аллоҳга ниятни кўп қиласар эдим,
Ўзимга тан-сихатлик тиласар эдим.
Ниятим Маккага бормоқлик эди,
Мадина равзасин кўрмоқлик эди.

Хажда куч-қувват бер, дер эдим мудом,
Минг шукр, ҳосил қилдинг муддаом.
Зам-зам сувларидан ичдим мен қониб,
Дардларимга шифо топдим қувониб.

Сафо ила Марванинг орасида,
Хожар онамиз дарди эсимда.
Арофат тоғида турдим-ку бедор,
Минг шукр, етказдинг, эй Парвардигор.

Хажнинг амалларин бажардим бир-бир,
Шайтонни тошладим қилган-чун макр.
Курбонлигимни ҳам қабул эт, Раббим,
Каъба тавофидаň ёришди қалбим.

Үйингни кўрганда нурланди юзим,
Ибодат завқидан ёшланди кўзим.
Ҳар ишда, дўстларим, Ҳаққа дил боғланг,
Иноятларидан қўнгилни чоғланг.

Ўрол ҳожи НАРЗУЛЛАЕВ,
(марҳум) Қўширабот тумани

Туюқлар

Фоний-боқий кирғоқ, зир қатнайди сол,
Тасаввуф сувидан идрокимга сол.
Овора бўлмайин аросатда мен,
Икки дунё мени тўғри йўлга сол...

* * *

Үйқу келмас кўзларимга туну кун,
Аллоҳим, қийналдим ҳеч кўрмайин кун.
Субҳидам, юзингни кўрсат эртароқ,
Намозим ўқийин, сўнгра чиқсин кун.

* * *

Тўрт сурга ёд олдинг, қилмагил кўз-кўз,
Демагил кўрмади, тушмади бир кўз.
Кузатар доимо Аллоҳнинг ўзи,
Сенга насиб этсин исломий бир кўз.

Абдували МАМАТОВ,
Оқолтин тумани

Офат ва ибрат

Минглаб ўлим ҳамда минглаб ярадор,
Хар бирин ортида битта қисмат бор.
Лаҳзалар ичидан шунча жудолик,
Бунда фарқланмади шоҳлик, гадолик.

Вайрон бўлди кўплаб ҳашамдор уйлар,
Қанча-қанча обод ва кўркам жойлар.
Кўз очиб юмгунча юз берган офат.
Юртга олиб келди шунча талафот.

Ўзингизга: “Нечун?” деб савол беринг
Ва бунда Аллоҳнинг қудратин кўринг.
Худодан беамр тикан ҳам кирмас,
Лек кўплар Раббисин йўлидан юрмас.

Беш вақт намоз, рўза қийинми шунча?
Фарзларни бажаринг қўлдан келгунча.
Бу офат, балодан олайлик ибрат,
Кўзимиз очайлик келмасдан кулфат.

Куръон – эслатмани юборган Аллоҳ,
Унга амал қилган ҳеч тортмагай ох.

Сайд Вали ТОЖИБОЕВ,
Зомин тумани

Ота дуоси

Ота дуо қилса, тогу тошлар ҳам,
Бу олий ҳикмат деб иймонга келар.
Уйқудан уйғониб олтин бошлар ҳам,
Бемеҳр ёшлар ҳам инсофга келар.

Ота қалби эрур мавж урган дарё,
Осмону фалакдан дурлар ёғдирап.
Камол топ фарзандим, дея сен учун,
Бу ёруғ оламни сенга оғдирап.

Ота-онанг ҳаёт, ранжитма асло,
Уларнинг жисмига сен куч-мадор бўл.
Ёнган шамчироғин ўчирма асло,
Барқ уриб порлаган мисли қуёш бўл.

Остонанг покиза тут деб ҳаётда,
Бор меҳр, қувонч-ла берганман қандим.
Бошинг омон бўлсин, эй жигарбандим,
Қалбингдан жой олсин менинг бу пандим.

Комилжон АҲМАДЖОНОВ,
Шаҳриҳон тумани

Таъминот ОТА ЗИММАСИДА



Оила мустаҳкамлиги ва ун-даги тартиб-интизом, аввало, эр-кишининг салоҳияти ва шижоатига боғлик. Шу боисдан ҳам ота-боболаримиз ўғил болалар тарбиясига алоҳида эътибор бериб, уларни сабр-матонатли қилиб вояга етказишган.

Албатта, турмушда яхши-ёмон кунлар бўлиб туради. Ҳар бир йигит бунга тайёр туриши, уларни собитқадамлик билан енгигб ўтиши лозим. Лекин “оила дегани шу бўлса...” деб қўл силтаб, аёлига, фарзандига бепарво бўлиш ярамайди.

Пайғамбаримиз алайҳиссалом ҳадиси шарифда: “Ҳар бирингиз мутасаддисиз, ҳар бирингиз қўл остингиздагилар учун масъулсиз. Ҳар бир раҳбар инсонлар устидан мутасаддидир ва улар учун масъулдир. Эр ўз аҳли аёли ва қўл остидагилар устидан мутасаддидир ва улар учун масъулдир. Хотин эрининг уйида мутасаддидир ва қўл остидагилар учун масъулдир. Кул хожасининг молига мутасаддидир ва унинг учун масъулдир. Ҳар бирингиз қўл остингиздагилар учун масъулсиз”, деганлар (Имом Бухорий ривояти).

Шундай экан, ҳар бир оила бошлиғи аёлига, фарзандлари-га масъулдир.

Афсуски, бугун айрим эркаклар зиммасидаги бурчни, йигитлик ор-ғурурини унубтиб қўяётгани

ҳам ҳақиқат. Мисол учун, айрим дангаса йигитлар оиласи муносабатларга енгил қараб, хотини ва фарзандларининг еб-ичиши билан қизиқмай, аёли ёки кекса ота-онаси қўлига қараб қолган. Тану жони соғ бўлса-да, ишлай, рўзгор тебратай демайди. Баъзилари эса ўзга юртларга ишлашга кетиб, йиллаб оиласи ҳолидан хабар олмайди. Оиласининг қандай кун кечираётгани, фарзандининг қай тарзда вояга етаётганига ҳам беэътибор. Бунинг оқибатида она-болалар мухтожликда кун кечириб, отанинг йўлига муштоқ бўлиб яшапти.

Баъзи йигитлар ўйламай-нетмай бор-буди ва уйини қимор ўйинларига тикиб юбораётгани, ич-килиқка ружу қўйиб, аҳли оиласини қийин ахволга солаётганини асло оқлаб бўлмайди. Уларнинг бу қилмиши нафақат фарзандларига зулм, балки жамиятга ҳам катта хавфдир. Ҳолбуки, бундай заарли амалларга мукласидан кетган одамнинг соғлиғи ёмонлашади, обрўйи йўқолади, оиласидан эса барака кўтарилади. Яқинлари эл-юрт олдида бошини кўтаролмай қолади.


Бу кабилар динимизда қаттиқ қораланади.

Пайғамбаримиз соллаллоҳу алайҳи ва саллам: “Эй Аллоҳум (Сенинг гувоҳлигингда), мен икки заиф – етим ва аёл кишининг ҳаққини (зое қилишдан) қаттиқ огоҳлантираман”, деганлар (Имом Насоий ривояти).

Мусулмон киши ҳар қандай ҳолатда ҳам ўз оиласини таъминлаб қўйиши, фарзандлари камоли учун қайғуриши, улар солиҳ-солиҳа бўлиб вояга етишига астойдил ҳаракат қилмоғи керак. Зоро, Набий алайҳиссалом: “Кишининг ўз фарзандини чиройли одоб-ахлоқ билан тарбиялаши кўп миқдордаги нафл садақа бершидан яхшироқдир”, деганлар (Имом Термизий ривояти).

Оиласида тинчлик, хотиржамлик ҳукм суришини истаган киши, аввало, ҳалол касб қилиши, оила қўрғони мустаҳкамлиги учун барча қийинчиликларни енгигб ўтиши керак. Шунда унинг топган-тутганида барака бўлади. Фарзандлари ҳам эл корига ярайдиган солиҳ инсонлар бўлиб етишади, иншоаллоҳ.

Дилмурод СОДИҚОВ



Муҳаққиқ аллома ШУАЙБ АРНАУТ

Муҳаддис ва муҳаққиқ олим Шуайб ибн Муҳаррам Арнаутий ҳижрий 1346

йил (милодий 1928) Дамашқ шаҳрида дунёга келди. Отаси Муҳаррам асли албаниялик бўлиб, кейинчалик Шомга кўчиб келган. Албан миллатига мансуб оилада дунёга келганлари учун “Арнаут” нисбатини олган. Усмонли турклар албанларни “Арнаут” деб номлашган.

Аллома дастлабки диний таълимни отонасидан олди. Ёшлик чоғларидаёт Дамашқ масжид ва мадрасаларига қатнаб, араб тилининг наҳв, сарф, адабиёт ва балогат каби фанларини пухта эгаллайди. Олим Дамашқнинг кўзга кўринган уламоларидан дарс олди. Шайх Солих Фарфурний ва шайх Ориф Давжийни алоҳида эслаб ўтиш лозим. Бу икки шайх Шомнинг машҳур уламоси шайх Бадруддин Ҳасанийнинг шогирдлари бўлишган.

Аллома Арнаут араб тили грамматикаси ва адабиётига оид китобларни, жумладан, Ибн Ақилнинг “Шарҳи алфийяту Ибн Молик”, Ибн Ҳожибининг “Кофия”, Замахшарийнинг “ал-Муфассал”, Ибн Ҳишом Ансорийнинг “Шузуз аз-заҳаб” ва Журжонийнинг “Асрорул балоға” каби китобларини тинмай ўқиди.

Сўнгра аллома бор эътиборини фикҳ мини ўрганишга қаратди. Кўплаб фикҳий китобларни, хусусан, ҳанафий фикҳига оид асарларни устозлари хузурида таълим олди. Булар қаторида Имом Шурунбулийнинг “Мароқул фалоҳ”, Имом Мусилийнинг “ал-Ихтиёр”, Имом Кудурийнинг “Мухтасар” ва аллома Ибн Обидиннинг “Раддул мұхтор” каби асарларини қайд этиш мумкин. Аллома Арнаут қарийб етти йил умрини фикҳни ўрганишга сарфлади. Усулул фикҳ, тафсир ва мусталаҳул ҳадис каби илмларни пухта эгаллаган чоғида алломанинг ёши ўттизлардан ошган эди.

Аллома ҳадисларни ҳам чуқур тадқиқ этиш, саҳиҳ ва заиф ҳадисларни аниқлаш-

тиришга доир китобларни ҳам илмий таҳқиқ қилишга зарурат борлигини англайди. Шундан сўнг шахсан ушбу масъулиятли вазифани амалга оширишга киришади. Натижада 1955 йилдан араб тили илмларидан дарс беришни тўхтатди. Исломий меросни таҳқиқ қилишга киришган аллома 1958 йил Дамашқдаги “Ал-макtab ал-исламий” номли нашриётда иш бошлайди. Йигирма йил мобайнида таҳқиқ бўлими бошлиғи сифатида фаолият юритади. Турли илмларга оид етмиш жилдан ортиқ китобларни бевосита ўзи таҳқиқ қиласди ёки илмий гуруҳга раҳбарлик қиласди.

1982 йилда Амман шаҳридаги “Муасасатур рисала” нашриётига ишга ўтди. Бу ерда ҳам исломий меросни ўрганиш гуруҳига самарали тарзда раҳбарлик қиласди.

“Ал-макtab ал-исламий” нашриётидаги таҳқиқ қилган китоблари: Имом Бағавийнинг “Шарҳис сунан” китоби (16 жилд), Имом Нававийнинг “Равзатут толибийн” китоби (Шайх Абдулқодир Арнаут билан биргаликда, 12 жилд), аллома Ибн Манзурнинг “Мухторул ағоний” (12 жилд), аллома Ибн Муфлиҳ Ҳанбалийнинг “Алмубди фий шарҳи мұқни” китоби (10 жилд), аллома Ибнул Жавзийнинг “Задул масийр фий илмит тафсийр” китоби (шайх Абдулқодир Арнаут билан биргаликда, 9 жилд) ва бошқа кўплаб китобларни таҳқиқ қиласган.

Аллома Шуайб Арнаут кўплаб олимларнинг эътирофига сазовор бўлган. Шайх Абул Ҳасан Надвий уни “Тадқиқотчи муҳаққиқ олим”, Шайх Абдул Фаттоҳ Абу Гудда “Маҳоратли муҳаққиқ олим” дея таърифлаган.

Аллома Шуайб Арнаут ҳижрий 1438 йил муҳаррам ойнинг 26-санасида, милодий 2016 йил 27 октябрда Урдун пойтахти Аммон шаҳрида вафот этди.

**Нуриддин РАИМОВ,
Имом Бухорий номидаги
Тошкент ислом институти талабаси**

Тарихи Мұхаммадий

(Давоми. Бошланиши ўтган сонларда.)

БАДР ФАЗОТИ

Үзлари бирмунча саҳобалар билан илгарилаб Мадинаға юрдилар. Улардан бир-икки кун олдинроқ Мадина шаҳрига етдилар. Ҳаммадин аввал бошига бир чо-ра кўтарган яҳуд хотини Расулуллоҳни қарши олди. Қарасалар, чора ичидаги қовурилиб, пиширилган қўзи гўшти бор эди. Ул хотун:

— Эй Мұхаммад, алқамдуиллоҳ, сени саломат күрдим. Агар Мұхаммад шу сафардин саломат қайтса, Худо йўлида бир қўзи сўйиб пиширайин, эл олди билан қарши олиб, шу таомдин егизай, деб ўзимга назр қилиб қўйган эдим. Мана, мақсадимга етдим, Худо муродимни берди, — деб чораси билан қўзи этини келтириб, Расулуллоҳ олдиларига қўйди. Тангрининг қудрати билан чорадаги қўзи гўшти шу ҳолда тилга келди:

— Эй Мұхаммад, мен оғуланмиш эрурман. Бу хотун зақар құшиб, мени пишириди, зинҳор мендин емагайсиз, — деб ўзидан хабар берди.

Аллоҳ амри билан бундоқ мүйжиза күрилгач, у хотуннинг хиёнати маълум бўлиб, Расулуллоҳ анинг таомидан емадилар. Аммо бу тўғрида ул хотундин сўз ҳам сўрамадилар. Шу билан Расулуллоҳ Мадинага яқинлашиб келганларида катта-кичик бутун халқ тўсиб чиқишиди. Чўрилар ва ёш қизлар ўз одатларича, чилдирмалар чалиб, шодлик қўшиқлари айтишур эди. Шундоқ бўлиб, табрик маросимлари су-юнчилик билан ўтказилди.

Мүминларга қандоқ суюнчилик бўлди
эрса, Курайш мушриклари Бадрда ен-
гилиб, Макка шаҳрига борганларидан
сўнгра мотам тутмаган уй қолмай, қаттиқ
қайғуришдилар. Жоҳилият одатларича, эру
хотин демай. Йиғи-зори килгани туришди.

Урушда ўлганларнинг хотинлари ва яқин қариндошлари мотам белгиси қилиб, соч-соқолларини кесдилар. Ўлганнинг мингани оти ёки туяси қолган бўлса, шуларга қора кийдириб, ёпуғлаб ўртага қўйилур эди. Қоп-қора мотам либосини кийишган хотун-қизлар булар атрофида чеврулуб, навҳа (ўлганни мақташ) бирлан йиғлашур эди. Мана шундоқ қаттиқ мотам тутишиб, бир ой ўтказдилар. Сўнгра ўзаро бу мотам йиғисини қимасга маслаҳат қилишди. Чунки Муҳаммад ва унинг йўлдошлари буни эшитур бўлсалар, аларга суюнчилик бўлғай, энди бизлар қонга-қон, жонга-жон олиб, ўлганлар ўчини олмагунча аларга йиғламагаймиз, деб қарор қилдилар. Шунинг билан йиғилари тўхтатилди.

Расулуллоҳ бўлсалар, Мадина шаҳрига кириб ором олдилар.

АСИРЛАР ҲАҚИДА МУЗОКАРА

Сүнгра асиirlар түғрисида сүз бошланди. Расулуллоқ бу ҳақда саҳобаларга маслаҳат килдилар. Анда ҳазрати Умар айтди:

– Ё Расулаллоҳ, булар сизни ёлғончи қилишди, ўзингизга ва ҳам сизга имон келтиргувчиларга қилмаган ёмонликла-ри қолмади. Охирида ўз ватанимиздан қочиб чиқмоқقا мажбур бўлдик, усти-мизга қўшин тортиб келиб, ўзлари уруш қилдилар. Эндиғи менинг маслаҳатим шуки, буларни қатлиом қилайлик, барни қўймай ўлдирайлик. Булар ичидаги түкъан қариндошларим бўлса, бу-юринг, аларни мен ўлдирай. Ҳамзанинг яқинларини Ҳамзага, Алининг яқинларини Алига топширинг, ўлдирсинглар, бошқа-лари ҳам шундоқ қилсунлар. Булар куфр бошликлари, бузуқларнинг беклари эрур-лар. Буларни тирик қолдирмагаймиз, сўнгра бошимизга бало бўлур, – деди.

Ансор саҳобалардин Саъд ибн Мутьоз, Абдуллоҳ ибн Равоҳа шу фикрга қўшилдилар. Анда Абу Бакр Сиддиқ:

— Ё Расулаллоҳ, бу асирлар бўлса, ўз уруғаймоқларимиздур. Аллоҳ таоло сизга зафар берди, биз аларни енгиб, асир олдик. Энди буларни ўлдирмоғимиздан тирик қолдирмоғимиз яхшироқдур. Жон бошига мол кесиб, булардин фидя олайлик. Бу ишимиз эрса, келаси кунларда биз учун куч-қувват бўлғусидур. Балки асирлар ўлимдан қолсалар, сўнгги кунларда ажаб эмаским, ҳидоят топгайлар, у чоғда сизга кучли ёрдам бўлгайлар, — деди.

Шундоқ бўлиб, бир-бирига қарши бўлган икки фикр ўртага ташланди. Анда Расулуллоҳ айтдилар: “Аллоҳ таоло бировнинг қўнглини юмшоқ яратур, андоқ кишининг қўнгли сутдек оқ, қаймоқдек юмшоқ бўлур. Яна бировнинг қўнглини тошдин ҳам қаттиқроқ қилур. Эй Абу Бакр, сен ўтган пайғамбарлардан Иброҳим Халилуллоҳдек қўнглинг юмшоқдур. Ул айтмиш эрди:

— فَمَنْ تَبْعِيْ فِإِنَّهُ مِيْ وَمَنْ عَصَيْ فَإِنَّكَ
غُفُوْرَ رَحِيمُ

“Фаман табианий файннаҳу минний ва ман асоний файннака ғафурр-роҳим” [Иброҳим, 14/36]. Маъноси: “Ҳар ким менга штоат қилур эрса, ул кимса мендин бўлур. Агар менга бўйинсуңмасдин қаршилик қилур бўлса, ул чоғда Ғафурсан, Раҳимдурсан”, демакдур. Яъни, унга ғазот қилмасдин, ёзуқларини ёпиб, яна раҳмат қилур эрсанг, эрклиқдурсан.

Иброҳим алайҳиссаломнинг бу айтган сўзларига қаралса, ул зотнинг қўнгли юмшоқлиги ва раҳмдиллиги маълум бўлур. Чунки ўзига иймон келтурмай, қаршилик қилгувчи кишиларга ҳам ёмонликни раво кўрмадилар. Балки ёзиқларини кечирмоқни Аллоҳдин сўрадилар. Сўнгра ҳазрати Умарга қараб дедиларки:

— Эй Умар, сенинг бу айтган сўзинг Нух пайғамбар айтган сўзидек турур. Ул айтмиш эрди:

— لَا تَذَرْ عَلَى الْأَرْضِ مِنَ الْكَافِرِينَ دَيَارًا

“Ла тазар ъалал арзи минал кафирий-на дайяро” [Нух, 71/26]¹. Маъноси: “Эй Рabbim, Ер узра коғирлардан ҳеч киши қўймай ҳалок қил!”

Бу сўзлардан сўнгра Расулуллоҳ уйларига кириб кетдилар. Маслаҳат бергувчиларнинг сўзларини англаб, ҳеч бирини рад қилмадилар. Ҳар икки фикрни тўғри топган бўлсалар ҳам, лекин ҳазрат Абу Бакр фикрига қўнгиллари мойил бўлди². Сўнгра саҳобаларга қараб:

— Сизларда фақирлик ва камбағаллик бордур, ҳар киши ўз асирини яхши сақласин, алардин фидя мол олиб, сўнгра бўшатгаймиз, — дедилар.

Бу сўз Қурайшга онгланди. Алар айтдилар:

— Биз бу ишга шошқинлик билан киришмайлик, агар асирларни қайтариш учун фидя молларини илдам юборур бўлсақ, Муҳаммад бундан осиғланиб (фойдаланиб), биздин ортуқча мол сўрап. Ўлим устига яна мол бериб, товон тўламак биз учун оғирдир. Шу сўз билан бу ишни кечиктиromoқчи бўлдилар.

Шундоқ бўлса ҳам, мушриклардан Мутталиб деган киши бу сўзга кулоқ солмай, яширинча Мадинага келди. Бунинг отаси Абу Видоъ асир тушганлардан эди. Тўрт минг танга товон тўлаб, отасини ажратиб олди. Буни кўриб, Қурайш халқи асирлар учун орқама-орқа фидя молларини юборишга киришдилар. Тўрт минг тангадан минг тангагача товон тушган эди. Буни тўлашга кучи етмаган киши, агар ўқишишни яхши билур бўлса, Мадина болаларидан ўн болага ўқишишни ўргатмоқ шарти ила озод қилинди. Яна асирлардан Амр отаси Абу Суфёндан фидя молини юборишни талаб қилди. Отаси мол юборишга рози бўлмай, “Муҳаммадни боламга ва молимга нечук эга қилурман? Қўйинглар, тилаганича боламни қўлида сақласин”, деб фидя молини юбормади.

Алихонтўра СОҒУНИЙнинг
“Тарихи Муҳаммадий” асаридан

Давоми бор...

¹ Қандехлавий. Ҳаётус-саҳоба, т. 2, 173-бет.

² Ибн Қайюм Жавзий. Зодул-маод (тарж.), т. 3, 144-бет.

Бозордаги озорлар

Афсус, бугун бозорда алдов, фирибгарлик күпайиб кетди. Айниқса, сархил мева-лар сотиб олиш илинжида одамлар бозор-ларга серқатнов. Аммо күпинча харидингиз сотувчи мақтагандай бўлиб чиқмайди. Нархлар ўзгартмоқда, бироқ сифат-чи?

“Саодат асри қиссалари” асарида “Мұхаммад ибн Абдуллоҳ қўлидаги молни со-тар экан, уни ортиқ даражада мақтамасди. Сотиб олаётганда камситиш, сотаётганда ортиқча мақташ одати йўқ эди унда”, дейи-лади. Мана шу қисқа лавҳа бозор аҳли учун катта намунаидир.

Абу Сайд Худрий розияллоҳу анхудан ривоят қилинган ҳадисда Расулуллоҳ соллаллоҳу алайҳи ва саллам бундай деган-лар: **“Ростгўй, омонатли тожир (тижо-ратчи) набийлар, сиддиқлар ва шаҳидлар билан биргадир”** (Ином Термизий ривояти).

Дарҳақиқат, ҳадиси шарифда айтилган сифатларга эга тижоратчи савдо қилганида фожирлик, алдамчилик ва ҳаромхўрликка йўл қўймайди. Агар у тақводор, яхшилик қилувчи ва ростгўй бўлмаса, бу дунёда ҳасрат чекади, охиратда эса шарманда бўлади.

Савдогар шариат кўрсатмасига бино-ан йўл тутса, унинг иши ибодат санали-ши билан бирга баракали бўлади. Сабаби, бундай савдогарлар тижоратлари орқали нафақат ўзларига, балки атрофдаги жамият, қишлоқ, шаҳар ва маҳаллаларга ҳам катта наф келтириб, кўпчиликнинг эҳтиёжини қондирадилар. Қолаверса, пайғамбарлардан Нуҳ ва Мұхаммад алайҳимассалом, хали-фалардан эса, ҳазрати Абу Бакр Сиддиқ ва Усмон ибн Аффон розияллоҳу анхумо ти-жорат билан шуғулланганлар.

Улуғ зотларнинг биридан: “Обид устунроқми ёки омонатдор савдогарми?” деб сўралганида, бундай жавоб берган: “Омонатдор савдогар устун. Чунки молни сотиш ёки олиш пайтида шайтон уни та-розидан уриб қолишга ундейди, у бунинг аксини қилиб, шайтондан устун келади”.

Умар ибн Хаттоб розияллоҳу анху бун-дай деганлар: “Эй камбағаллар жамоа-си! Бошларингни кўтариб, савдогарлик

қилинглар, албатта, йўл очиқдир, одамларга муҳтож бўлманглар”.

Тожир молини ўтказиши учун қасам ичиши тўғри эмас. Зеро, Абу Ҳурайра розияллоҳу анхудан ривоят қилинган ҳадисда Расулуллоҳ соллаллоҳу алайҳи ва саллам бундай деганлар: **“Қасам (ичиши) савдо молини ўтказувчи, баракани ўчирувчидир”** (Ином Бухорий ривояти).

– Бир дўкондан ширинлик сотиб олдим. Олиб келсан, ичи моғорлаб кетибди, – дейи-ди Марҳабо опа. – Пул-ку топилади, аммо маҳсулотнинг уволи-чи? Ахир, дунёда қанчадан-қанча одамлар очлиқдан азият чекмоқда.

– Тўғриси, матонинг фарқига бормайман. Бир куни шахримиздаги бозорлардан би-рида оёқ кийим олдим. Савдогар уни оши-риб мақтади. Тоза чарм, деди. Аммо ундей эмас экан. Ёлғон гапириш савдогарларга одат бўлиб қолганми, билмайман, – дейди Абдуҳамид исмли юртдошимиз.

Ҳазрат Умар розияллоҳу анху савдо қонун-қоидаларини билмайдиганларни ўзига ё ўзгага зарар қилмасин, деб бозорга киритмаган. У зот бундай деган: “Динда фақиҳ бўлмаган ва савдо қонун-қоидаларини бил-маган киши бозорда савдо қилмасин, чунки у ўзига ёки ўзгага зарар қиласди”.

Савдогарларнинг муомала маданияти ҳам оғриқли масала. “Нега қиммат?” ёки “Нега сифатсиз?” дейишингиз билан акса-ри “Арzon жойидан ол, сифатлисига пулинг етадими?” сингари қўпол жавоблар бери-шади. Бир хил номдаги айни маҳсулот учун сезиларли даражада фарқли нархлар белги-лаб олиниши кишини ўйлантиради. Ахир, ота-онаси фақат ойлик олганда тансиқ нарсадан тотинадиган болалар, егиси кел-ган маҳсулот ёнидан тамшаниб ўтаётган ҳомиладор аёллар, етимлар, ноchorлар юради орамизда. Зотан, бу ишларнинг ҳам жавоби бор. Қандай йўл билан бўлмасин, бозорда фойда кетидан қуваётган айrim сотувчилар, огоҳ бўлинг, бозор қиламан, деб озор берманг, озорнинг азоби ҳам борлиги эсингиздан чиқиб қолмасин!

Камола АДАШБОЕВА